


B
128
L83L53
V.6



陸子學譜卷之十六

南昌萬承蒼訂

後學臨川李紱編

陸川龐嶼校

門人上

歐陽子謂受業者爲弟子。受業於弟子者爲門人。後世誤
渾爲一。孔氏門人見於論語者可考也。孟子論見知不獨
在親炙。凡去聖人之世未遠者皆得與焉。蓋世之相近源
流親切。則亦與弟子無少殊耳。陸子再傳之士。名人甚衆。
而發明陸學。若包文肅袁正肅二公。尤宏偉。統緒所在。不
可沒也。今錄門人爲二卷。
包文肅公恢

宋史本傳

包恢字宏父建昌人自其父揚世父約叔父遜從朱熹陸九淵學恢少爲諸父門人講大學其言高明諸父驚焉嘉定十三年舉進士調金谿主簿邵武守王遂辟光澤主簿平寇亂建寧守袁甫薦爲府學教授監虎翼軍募土豪討唐石之寇授掌故改沿海制置司幹官會歲饑盜起金壇溧陽之間恢部諸將爲討誅夷之沿江制置使陳韓辟爲機宜復有平寇功改知吉州永豐縣未行差發運幹官福建安撫使陳塏檄平寇遷武學諭宗正寺主簿添差通判台州徐鹿卿討溫寇辟兼提點刑獄司主管文字議收捕改通判臨安府遷宗正主簿知台州有妖僧居山中號活佛男女爭事之因爲姦利豪貴風靡恢誅其僧進左司郎官未行改湖北提點刑獄未

行移福建兼知建寧閩俗以九月祠五王生日靡金帛傾市奉之恢曰彼非犬豕安得一日而五子同生非不祥者乎而尊畏之若是衆感悟爲之衰止兼轉運判官以侍御史周坦論罷光州布衣陳景夏上書云包恢剛正不屈之臣言者污蟻之耳又四年起爲廣東轉運判官權經畧使遷侍右郎官尋爲大理寺少卿即日除直顯文閣浙西提點刑獄是時海寇爲亂恢單車就道調許澈浦分屯建砦一旦集諸軍討平之嘉興吏因和糴受賕百萬恢被旨慮囚曰吾用此消殄氣乃減死斷其手進直龍圖閣權發運升秘閣修撰知隆興府兼江西轉運沉妖妓於水化爲狐人皆神之有母愬予者年月後作疏字恢疑之呼其子至泣不言及得其情母孀居與僧通惡其子諫以不孝坐之狀則僧人爲之也因責子侍養

跬步不離。僧無由至。母乃託夫諱。日入寺作佛事。以籠盛衣帛。因納僧於內。以歸。恢知之。使人要之。置籠公庫。逾旬。吏報籠中臭達於外。恢命沉於江。語其子曰。爲汝除此害矣。又姑死。假子婦棺以斂。家貧不能償。婦愬於恢。恢怒。買一棺。給其婦。臥棺中。以試。就掩而葬之。改湖南轉運使。罷。景定初。拜大理卿。樞密都承旨。兼侍講。權禮部侍郎。尋爲中書舍人。林希逸奏。恢守法奉公。其心如水。權刑部侍郎。進華文閣直學士。知平江府。兼發運。豪有奪民包舉田。寄公租。誣上者。恢上疏。指爲以小民祈天永命之一事。帝覽。惻然。罪任事者。即歸民田。詔赴闕。辭。改知紹興。又辭。度宗即位。召爲刑部尚書。進端明殿學士。僉書樞密院事。封南城縣侯。郊祀禮成。還。以資政殿學士致仕。恢歷任所至。破豪猾。去姦吏。治蠱獄。課益鹽。理

銀欠政聲赫然。嘗因輪對曰：此臣心惻隱，所以深切爲陛下告者。陛下惻隱之心如天地日月，其閉而食之者曰：近習曰：外戚耳。參知政事董槐見而歎之曰：吾等有慚色矣。他日講官因稱恢疏剴切，願容納理宗欣然曰：其言甚直。朕何嘗怒直言。經筵奏對誠實懇惻，至身心之要，未嘗不從容諄至。度宗至此，恢爲程頤、程頤恢侍其父疾，滌濯掃除之役，不命僮僕。年八十有七，臨終舉懷慎臥簣窮約事，戒諸子歛以深衣。作書別親戚而後卒，有光隕其地。遺表聞，帝輟朝，贈少保，謚文肅，贈銀絹五百。

遺文

淳熙六年丙午春正月二日，奉旨旌表先生門閭。八年戊申夏五月朔，包文肅公作旌表門閭記，其畧云：門閭之高，不惟

其人此古今所尤難者。惟陸氏五世而有文達、文安二大儒。以人品之高、道術之明，特起東南，上續道統，實以師表四海。非僅以師表一家、大學致知、誠意、正心、修身、齊家、治國、平天下之全體大用，具在於是矣。陸氏所以名家，由二先生之名世也。

淳祐十年庚戌夏五月，撫州守葉夢得命金谿宰立更剏先生祠堂，增葺書院。九月，建梭山復齋、象山三先生祠堂於郡學之東。以袁熒和叔傅子雲季魯侑。十一年辛亥春三月望日，包文肅公撰三陸先生祠堂記，發明先生之學，最爲明晰。可以盡破俗學之疑。今錄其文於後云：以正學名天下而有三先生焉。萃在一郡一家。若臨川陸氏昆弟者，可謂絕無而僅有歟。梭山寬和凝重，復齋深沉周謹，象山光明俊偉。此其

資也。固皆近道矣。若其學之淺深。則自有能辨之者。梭山篤信聖經。見之言行。推之家法。具有典刑。雖服先儒之訓。而於理有不可於心者。決不苟徇。惜其終於獨善。而不及見諸行事。之著明。復齋少有大志。浩博無涯。洎觀書無滯礙。繙閱百家。晝夜不倦。自爲士時。已有稱其得子思孟子之旨者。其後入太學。一時知名士咸師尊之。則其學可知矣。又惜其在家在鄉。僅可見者。輔成家道之修整。備禦湖寇之侵軼。紀綱肅而橐龔悉革。誠意孚而人心興起。卓然爲海內儒宗。繫天下之望。而恨未得施其一二耳。若夫象山先生之言論風旨。發揮施設。則有多於二兄者。蓋自其幼時。已如成人。淵乎似道。有定能靜。實自天出。不待勉強。故其知若生。知其行若安。行粹然純如也。蓋學之正而非他。以其實而非虛也。故先生嘗

曰。宇。宙。間。自。有。實。理。此。理。苟。明。則。自。有。實。行。有。實。事。實。行。之。
人。所。謂。不。言。而。信。又。自。謂。平。生。學。問。惟。有。一。實。則。萬。虛。皆。碎。
嗚。呼。彼。世。之。以。虛。識。見。虛。議。論。習。成。風。化。而。未。嘗。一。反。就。實。
以。課。日。進。月。新。之。功。者。觀。此。亦。嘗。有。所。警。而。悟。其。非。乎。夫。道。
不。虛。行。若。大。路。然。苟。得。實。地。而。實。履。之。則。起。自。足。下。之。近。可。
達。千。里。之。遠。故。自。仁。之。實。推。而。至。於。樂。之。實。自。有。樂。生。惡。可。
已。之。妙。其。實。可。欲。者。善。也。實。有。諸。已。者。信。也。自。善。信。而。充。實。
有。光。輝。焉。則。其。實。將。益。美。而。大。是。誠。之。者。人。之。道。也。由。大。而。
化。則。爲。聖。而。入。於。不。可。知。之。之。神。是。誠。者。天。之。道。也。此。乃。孟。
子。之。實。學。可。漸。進。而。馴。至。者。然。而。無。有。乎。爾。則。亦。久。矣。先。生。
嘗。論。學。者。之。知。至。必。其。智。識。能。超。出。千。五。百。年。間。名。世。之。士。
而。自。以。未。嘗。少。避。爲。善。之。任。者。非。敢。奮。一。旦。之。決。信。不。敏。之。

意而徒爲無忌憚大言也。蓋以其初實因深切自反。灼見善非外鑠。徒以交物有蔽。淪胥以亡。自此不敢自棄。是其深造自得。實自孟子故曰。孟子之後至是始一明其誰曰不然。四方聞其風來學者輻輳。先生明於知人。凡所剖決必洞見其肺肝。所箴砭必的中其膏肓。各有感動。覺其良心而知其正性者爲多。然則其學真可質鬼神而無疑。俟聖人而不惑者矣。昭昭如是。豈其間有所疑惑焉。殆若不可曉者。是又烏得不因以致其辯歟。且道義之門自開闢以來一也。豈容私門戶乎。故其說曰。宇宙即是吾心。吾心即是宇宙。曰學者惟理是從。理乃天下之公理。心乃天下之同心。顏曾傳夫子之道不私。夫子之門戶。夫子亦無私。門戶與人爲私。商也曰。此理在宇宙間。未嘗有所隱遁。天地所以爲天地者。順此理而已。

人與天地並立爲三極。安得自私而不順此理哉。是先生之學。乃宇宙之達道。明矣。而或者乃斥以別爲一門。何耶。釋氏之說。自開闢以來。無有也。豈非橫出異端乎。故其說曰。取釋氏之聖賢而繩以春秋之法。童子知其不免。曰。今若徒自形迹。詞語間辨之。乃彼所謂職業。要其爲不守正道。無復有毫髮之近是者矣。曰。方士禪伯。真爲太崇。無復迷惑。則無偏無黨。王道蕩蕩。其樂可量哉。是先生之學。非釋氏之邪教。亦明矣。而或者指以爲禪學。又何耶。其窮理也。則曰。積日累月。考究磨練。嘗終日不食。而欲究天地之窮際。終夜不寢。而灼見極樞之不動。由積候以考曆數。因笛聲以知律呂。復齋嘗問其用功之處。則對以在人情物理事勢之間。嘗曰。吾今日所明之理。凡七十餘條。曰。天下之理無窮。以吾之所歷經者。

言之真。所謂伐南山之竹。不足以受辭。然其會歸總在於此。則與徒研究於方冊文字之中者。不同。何不知者。反謂其不以窮理爲學哉。其讀書也。則曰。古人爲學。即是讀書。而以何必讀書。然後爲學之反說爲證。以束書不觀。遊談無根之虛爲病。平昔精勤。人所不知。惟伯兄每夜必見其觀覽檢閱之。不輟。常明燭至四更而不寐。欲沉涵熟復。而切已致思。欲平淡玩味。而冰釋理順。則與徒乾沒於訓詁章句之末者。大異。何不知者。反妄議其不以讀書爲教哉。抑或謂其惟務超悟。而不加涵養。不求精進也。曾不知其言有曰。惟精惟一。涵養須如是。學之正而得所養。如木日茂。泉日達。孰得而禦之。又曰。雖如顏子。未見其止。易知易從者。實有親有功。可久可大。豈若守株坐井然者。則如彼。或者之所謂者。誤矣。又或謂其

惟尚捷徑。而若無次第。若太高也。曾不知其言有曰。學有本末先後。其進有序。不容躐等。吾所發明端緒。乃第一步。所謂升高自下也。曰。天所與我至平至直。此道本日用常行。近乃張大虛聲。當無尚虛見。無貪高務遠。至有一二問學者。惟指其嘗主持何人。詞訟開通何人。賄賂以折之。曰。即此是實學。如或者之所謂者。又誤。獨所大恨者。道明而未盛行爾。故上而致君之志。僅畧見於奏對。惟其直欲進於唐虞。復乎三代。超越乎漢唐。此乃朱文公稱其規模宏大。源流深遠。非腐儒鄙生之所能窺測。而語意圓活。渾浩流轉。見其所濫造而所養厚也。下而澤民之意。亦粗見於荆門。惟其以正人心爲本。而能使治化孚洽。人相保愛。至於無訟。筭不施。雖如吏卒亦勉以義。此識者知其有出於刑政號令之表。而周文忠以

爲荆門之政。可驗躬行之效者也。然其所用者有限。而其所
未用者無窮。先生以道之廣大悉備。悠久不息。而人之得於
道者。有多寡久暫之殊。是極其所志。非多且久。未已也。故自
志學而至從心。常言之。志所期也。嗚呼。假之以年。聖域固其
優入而過化。存神上下。天地同流之功用。非曰小補者。亦其
優爲也。孰謂其年僅踰中身而止。知命哉。邇其旨。與梭山未
同者。自不嫌於如二三子之不同。而有同。若復齋則初已是
其說於鵝湖之會。終又指言其學之明於易簣之時。則亦無
間然矣。逮論其文。則嘗語學者以窮理。理實則文皆實。又以
凡文之不進者。由學之不進。先生之文。即理與學也。故精明
透徹。且多發明前人之所未發。炳蔚如也。梭山諱九韶。字子
美。復齋諱九齡。字子壽。謚文達。象山諱九淵。字子靜。謚文安。

郡學舊有祠，未稱也。今郡守國之秘書葉公夢得下車之初，士友請易而新之。公即慨然曰：「果非所以嚴事也。」乃命郡博士趙與勳相與謀之，旋得隙地於學之西，遂肇造祠廟三間，翼以兩廡，前爲一堂，外爲四直舍，又外爲書樓，下列四齋，橫開方地，地外有竹，竹間結亭，內外畢備。祠貌甚設，皆前所未有也。庶幾嚴事之禮歟。左侑以袁公燮以其爲先生之學，而嘗司庠於是邦，且教行於一道，次侑以傅公子雲以其爲先生之所與，而嘗掌正於是學，且師表於後進。葉公得傅公之傳，而自象山者也。祠實經始於淳祐庚戌之季秋，至仲冬而落成云。

按包文肅公詩文雄偉，有集行世。書法亦工。吳文正公澄集中有題宏齋包公巽齋歐陽公遺墨後云：「王谿翁嘗登。」

盱江宏齋先生廬陵吳齋先生之門。予於二先生皆聞其風而不及識。今見翁所藏六詩一書如見其人焉。得包之卓偉則於道可以進得歐陽之醇厚則於非有所不爲觀者因是踴躍奮迅以希前修可也。豈可但珍其遺墨而已哉。王谿翁名未詳。既云登宏齋之門則亦本陸子之淵源矣。文肅諸父雖兼遊於朱陸之門其心悅而誠服則陸子也。至文肅則全爲陸子之學而直斥疑陸子者爲虛見識。虛議論習成風化而未嘗一反已就實以課日進月新之功。蓋陸子再傳弟子惟包文肅袁正肅二公尤爲能大昌陸子之學。故門人中首列二公焉。

袁正肅公甫

兄肅

宋史本傳

袁甫字廣微。寶文閣直學士燮之子。嘉定七年進士第一。僉書建康軍節度判官廳公事。授秘書省正字。入對論君天下不可一日無懼心。今之可懼者大端有五。端良者斥。諂諛者用。杜忠臣敢諫之門。可懼也。兵戈既興。餽餉不繼。根本一虛。則有蕭牆之憂。可懼也。陛下深居高拱。羣臣奉行簿書。獨運密謀之意。勝而虛心咨訪之意微。天下迫切之情。無由上聞。可懼也。外患未弭。內患方深。而熙熙然無異平時。自謂雅量足以鎮浮。不知宴安實爲鴆毒。可懼也。陛下恭儉有餘。剛斷不足。庸夫儉人苟求富貴。而未聞大明黜陟。軍帥交結州郡。賄賂皆自貴近化之。可懼也。其他禍幾亂萌。不可悉數。將何以答天譴。召和氣哉。次乞嚴守帥之選。併大軍之權。與屯田之利。遷校書郎。轉對言邊事之病不在外而在內。偷安之根。

不去規摹終不立。壅蔽之根不去。血脉終不通。忌嫉之根不
去。將帥終不可擇。欺誕之根不去。兵財終不可治。祖宗之御
天下政事。雖委中書。然必擇風采著聞者爲臺諫。敢於論駁
者爲給舍。所以戢官邪。肅朝綱也。今日誠體是意以行之。豈
復有偷安壅蔽者哉。出通判湖州。考常平敝原以增積貯。核
隱產增附嬰兒局。遷秘書郎。尋遷著作佐郎。知徽州。治先
教化。崇學校。訪便民事。上之。請蠲減婺源源綢絹萬七千餘匹。
茶租折帛錢萬五千餘貫。月椿錢六千餘貫。請照咸平紹興
乾道寬恤指揮。受納徽絹定每匹十兩。請下轉運常平兩司
豫蓄常平義倉備荒。興修陂塘。剏築百梁。丁父憂。服除。知衢
州。立旬講務。以理義淑士心。歲撥助養士千緡。西安龍游常
山三邑積窘預借爲代輸三萬五千緡。蠲放四萬七千緡。郡

有義莊買良田二百畝益之。移提舉江東常平。適歲旱。亟發庫庾之積。凡州縣窶名隸倉司者。無新舊皆住催。爲錢六萬二千緡。米十有三萬七千。麥五千八百石。遣官分行賑濟。飢者予粟。病者予藥。尺籍之單弱者。市民之失業者。皆曲軫之。又告於朝曰。江東或水而旱。或旱而水。重以雨雪連月。道殣相望。至有舉家枕籍而死者。此去麥熟尚賒。事勢益急。詔給度牒百道助費。時江閩盜迫饒信。慮民情易動。分榜諭安之。檄諸郡關制司聞於朝。爲保境捍禦之圖。寇迄不犯。遂提點本路刑獄。兼提舉移司。番陽霜殺桑。春夏雨久。湖溢諸郡被水。連請於朝。給度牒二百道賑恤之。盜起常山。調他州兵千人屯廣信。以爲備。郡城大火。上封事言上下不交。以言爲諱。天意人心實同一機。災變之作。端由於此。願下哀痛之詔。以

回天意。詔求直言。復上疏言。災起於都邑。天意蓋欲陛下因其所可見。察其所不可見。行至公無私之心。全保護大臣之體。率屬羣工。大明黜陟。與天下更始。行部問民疾苦。薦循良。劾姦貪。決滯獄。所至詣學宮講說。勅書院貴溪之南祠先儒。陸九淵。歲大旱。請於朝。得度牒緡錢。綾紙以助賑恤。疫癘大作。勅藥院療之。前後持節江東五年。所活殆不可數計。轉將作監領事如故。繼力辭常平事。彗星見。詔求直言。上疏言。皇天所以震怒者。由愁苦之民衆。人民所以愁苦者。由貪冒之風熾。願一變上下交征之習。爲大公至正之歸。帝親政。以直徽閣。知建寧府。明年兼福建轉運判官。閩鹽隸漕司例運兩綱供費。後增至十有二。吏卒並緣爲姦。且抑州縣變賣公私。苦之。甫奏復舊例。丁米錢久爲泉漳興化民患。會知漳州趙

以夫請以廢寺租爲民代輸。甫并捐三郡歲解本司錢二萬七千貫助之。郡屯左翼軍本備峒寇。招捕司移之江西。甫檄使還營。俄寇作唐石。即調之以行。而賊悉平。遷秘書少監。入見。帝曰。卿久勞於外。篤意愛民。每覽所陳。備見懇惻。甫奏無逸之義。言知農夫稼穡之艱難。自然逸欲之念不起。乞力守更化以來求賢如不及之初意。遷起居舍人兼崇政殿說書。於經筵奏剛之一字。最切於陛下。陛下徒有慕漢宣勵精爲治之名。而乃墮元帝文宗柔弱不振之失。元帝文宗果斷不用於斥邪佞。反用於逐賢人。此二君不識剛德之真。所謂真剛者。當爲之事必行。不當爲者則斷在勿行。又乞專意經訓。養育精神。務令充實。上與天一下合人心。帝意欲全功臣之世。詔今中外臣僚奏事。毋得攬撫以奏。是消天下讜言之氣。

其謂陛下何。兼中書舍人奏繳不植苛小。謂監司郡守非其人。則一道一州之蠹也。時相鄭清之以國用不足。履畝使輸。券甫奏。避貴虐賤。有力者頑。未應令而追呼迫促。破家蕩產。悲痛無聊者。大抵皆中下之戶。嘗講罷。帝問近事。甫奏。惟履畝事。人心最不悅。又嘗讀資治通鑑。至漢高入關。辭秦民斗酒。因奏。今日無以予人。反橫科之。其心喜乎怒乎。本朝立國以仁。陛下以爲此舉。仁乎否乎。帝爲惻然。時朝廷以邊事爲憂。史嵩之帥西江。力主和議。甫奏曰。臣與嵩之居同里。未嘗相知。而嵩之父彌忠。則與臣有故。嵩之易於主和。彌忠每戒其輕易。今朝廷甘心用父子異心之人。臣謂不特嵩之之易於主和。抑朝廷亦未免易於用人也。疏入不報。遂乞歸。不允。授起居郎。兼中書舍人。未幾擢嵩之刑部尚書。復奏疏云。臣

與嵩之本無仇怨。但國事所係。誼難緘默。嵩之誥命。終不與書行。廼出甫知江州。王遂抗疏力爭。帝曰。本以授其兄袁肅。報行誤耳。令遂勉甫無他志。翌日。廼與肅江州。而殿中侍御史徐清叟復論甫守富沙日。贓六十萬。湯巾等又入爭之。清叟亦悔。未幾。改知婺州。不拜。嘉熙元年。遷中書舍人。入見。陳心源之說。帝問邊事。甫奏當以上流爲急。議和恐誤事。時清叟與甫並召。而清叟未至。甫奏臺諫風聞言事。初亦何心。今人物眇然。有如清叟。宜在朝廷。辭避實惟臣故。乞趣其赴闕。又奏備邊四事。曰。固江陵堰瓦梁。與流民復業。嵩之移京湖。沿江制置使知鄂州。甫奏曰。嵩之輕脫。難信。去年嵩之在淮。西王楫由淮西而來。北軍踵之。今又併湖南付之。臣恐其復以誤淮西者。誤湖南。疏留中不行。翌日。權吏部侍郎引疾至。

八疏。賜告一月。遂歸。從臣復合奏留之。尋命兼修玉牒。宮兼國子祭酒。皆辭不拜。改知嘉興府。知婺州。皆辭不拜。遷兵部侍郎。入見。奏江潮暴湧。旱魃爲虐。褚弊蝕其心腹。大敵剝其四肢。危亡之禍。近在旦夕。乞秉一德。塞邪徑。兼給事中。岳珂以知兵財。召甫奏珂總餉二十年。焚林竭澤。珂竟從外補。遷吏部侍郎。兼國子祭酒。日召諸生叩其問學。理義講習之益。時邊遽。日至甫條十事。至爲詳明。權兵部尚書。暫兼吏部尚書。卒。贈通奉大夫。謚正肅。有孝說。孟子解。後省封駁。信安志。江東荒政錄。防拓錄。樂事錄。及文集。行世。甫少服父訓。謂學者當師聖人。以自得爲貴。又從楊簡問學。自謂吾觀草木之發生。聽禽鳥之和鳴。與心相契。其樂無涯云。

遺文事蹟

紹定四年辛卯夏六月正肅任江東提刑奏建象山書院於
貴溪之徐巖祀先生。侑以楊敬仲袁和叔。初先生本欲躬書
院於山間。拜命守荆門不果。至是正肅奏建書院以山間不
近通道。乃命洪季陽相地。得徐巖近邑而境勝。坐已向亥。傳
季魯聞而譏之曰。書院爲講古習禮之地。而先聖先師北面
學者南面而拜之。非禮也。宜擇南面之地。季陽悚然。然已申
聞不復更卜。是日祝文云。先生之精神。其在金谿之故廬。優
游而容與耶。其在象山之精舍。言言而語語耶。抑周流於上
下四方。與天地游。與四時序耶。甫將指江東。聿興正學山之
旁近。爰客爰度。得勝景於徐巖。離象山而非邈。山峰環峙兮
高可仰。大溪橫陳兮清可濯。殆天造而地設。匪人謀之攸作。
是可宅先生之精神。無在無不在也。先生之道精一匪二。揭

本心以示人。此學門之大致。嗣先聖之遺響。警一世之聾瞶。平易切近。明白光粹。至今讀其遺書。人人識我良貴。由仁義行。與行仁義者。昭昭乎易判也。集義所生。與義襲而取之者。截截乎不可亂也。宇宙事已分。內事渾渾乎一貫也。議論一途。朴實一途。極天下之能言者。斯言不可贊也。嗚呼。先生之學如此。先生之精神如此。然則在金谿之故廬者如此。在象山精舍者如此。周流乎上下四方者亦如此。孰謂徐巖而獨非此耶。工役倣興。禮宜虔告。先生精神淵淵浩浩。又作上梁文。云盡其心。知其性。見先生存養之皆天。在則人亡。則書豈後學講明之無地。云云。是冬書院落成。買田養士。冬十月已未。正肅刊先生文集。自爲序。其畧云。象山先生文集。先君子嘗刊於江右。甫將指江左。新建象山書院。復摹舊本以惠後。

學先生發明本心上接古聖。下垂萬世。偉矣哉。此心神明。無體無方。是用平夷。莫非大道。是謂精一。是謂彝倫。是謂乾健。坤順。是謂日月星辰風雨霜露山川草木之變化。是謂鬼神之情狀。先生嘗言千百世之上。有聖人出焉。此心同也。此理同也。學者之心。即先生之心。甫藐焉晚出。景慕先生。戰兢自勉。寡過未能。先生之道大矣。奚容贊述。姑誦所聞。附於卷末。十一月朔。正肅遣池州屬官韓祥至書院祭告先聖。告文云。仰惟先聖之道。昭揭萬世。後學昏蒙。不知吾心。即道有宋知荆門軍陸某。獨能奮乎百世之下。指示道心。明白的切。闡教象山。學者師尊之。而歲久祠圯。有司弗葺。被命茲來。惕然大懼。遂卜地於貴溪之徐巖。鼎建書院。招延山長。俾承學之士。相與嚴事先聖。朝夕兢惕。道心融明。所以懋昭象山之教。而

上繼先聖之統緒也。甫職守攸縻弗遑躬詣祠下。心以告矣。紹定五年壬辰春三月袁甫至書院釋菜告文云先生之學得諸孟子我之本心光明如此未識本心如雲翳日既識本心元無一物先生立言本末具備不墮一偏萬世無弊書院肇建躬致一奠可聞非聞可見非見禮畢乃講書貴賤咸集溢塞堂廡以聽講畢續說曰象山先生家學有原一門少長協力同心所以敬養所親者既已恪供子職而伯叔之間自爲師友梭山復齋皆爲一時聞人而象山又傑出其中陋三代以下人物而奮然必以古聖人爲師發明本心嗣續遺響以大警後學之聾瞶天下以爲真孟子復出也言儒釋之異趨謂釋氏爲私吾儒爲公釋氏出世吾儒經世故於綱常所關尤爲之反覆致意洎班朝列直道而行不阿世好格心事

業斯世。深望焉。而媚嫉者沮之。雖一斤不復。浩如也。乃禮慈湖門人錢時爲堂長主教。遠近學者聞風雲集。至無齋以容之。則又修書院之外左方廢寺之法堂以處之云。

紹定六年癸巳春清明日。正肅作象山書院記。其畧曰。寧宗皇帝更化之末。興崇正學。尊禮老臣。慨念先朝碩儒。咸賜嘉謚。風厲四方。謂象山先生發明本心之學。有大功於世教。易名文安。庸示褒美。於時慈湖楊先生我先人絜齋先生有位於朝。直道不阿。交進讜論。寧考動容。天下學士想聞風采。推考學問淵源所自。而象山先生之道益大光明。甫承學小子。將指江東築室百楹。既壯且安。士遐邇咸集。齋曰志道明德。居仁由義。精舍曰儲雲佩玉。又皆象山先生之心畫也。正肅提刑江東。既建象山書院。又創鄱江書堂。自爲記云。或

問子曰子初象山書院於貴溪。興白鹿書院於廬阜。而又建
鄱江書院何也。余曰。子豈知余哉。余自爲童子。拱立侍旁。每
見師友過從。考德問業。熟矣。曾未十數年。次第凋零。及余兄
弟遊宦四方。同志者亦往往間見。未數十年。又皆寥落。如晨
星之相望。每爲之慨然。將指江東兩書院。蓋士友所宗之地。
振而起之。責實在余。故凡士之賴處象山。若白鹿者。各隨其
行輩。與其望實。或畀領袖之職。或在賓講之筵。衿佩咸集。彬
彬可觀矣。而余之所深慮者。已成之才。雖易於振拔。而後來
之秀。未保其嗣續。况士友之紛至。非聽其話言。參諸履行。則
未可得其爲士之實。於是選通經學古之士。帥生徒而課之。
余暇日亦數加考察。俟其有立也。乃分兩書院而肄業焉。此
鄱江書院之所以建也。諸老先生遠矣。師友道喪。士習日駁。

慕超詣者。無深實詳縝之功。驚辯博者。乏通貫融明之趣。轉相依倣諸老先生之本旨。愈晦不明。方且徇偏見。立異同。幾有專門名家之弊。其原皆起於論說多而事實寡。然則羣居書堂。相與切磨。亦求其所以爲人者。如何。爾在家庭。則孝友處鄉黨。則信睦。涖官。則堅公廉之操。立朝。則標正直之風。果若是。奚必問其自白鹿乎。自象山乎。不然。飽讀舊書。習熟遺訓。而孝友信睦。公廉正直。一有愧怍。自白鹿。則白鹿之羞也。自象山。則象山之玷也。可不懼哉。書堂凡四齋。曰達原。止善。存誠。養正。而講道之堂。則名曰得。得者何。井卦曰。無喪無得。往來井井。井之義大矣哉。雖汲而未嘗汲也。故愈汲愈新。雖養而未嘗養也。故愈用愈有。尚無有得。寧復有喪。本無可喪。於何求得。孝友也。信睦也。公廉正直也。行所當行。止所當止。

至平至常萬古一日何喪焉何得焉然則得云者得其無喪
無得者而已放勳之所謂使自得之者得乎此中庸之所謂
無入不自得者得乎此孟子之所謂深造自得者得乎此以
此而學爲人尚何論說之勝而事實之微乎尚何徇偏見立
異同而有專門名家之弊乎嗚呼鄱江書堂之學子而果不
失諸老先生之本旨也即所以教白鹿象山之學子皆不失
諸老先生之本旨也伐木之詩曰神之聽之終和且平學者
服膺斯言吾見道德一而源脉長矣勉之紹定六年孟夏鄞
川袁甫記并書

正肅自題正獻公文集云渾然天成者有道有德之言也道
德不足言辭雖工所謂天者已不全矣君子奚尚焉我先君
子之屬辭也吐自胸中若不雕鐫而明潔如星河粹潤如金

王真所謂渾然天成者乎。先君子自言。兒時讀書。一再過。即成誦。精神純固。無寒暑晝夜之隔。及壯。寢多不寐。凡所著述。率成枕上。至暮年。甚博。停畜日富。然未嘗襲人畦迕。尤不喜用難字。每誦先聖之言曰。辭達而已矣。立朝抗疏。懇惻忠愛。至其指事力陳。畧無回撓。入侍經幄。講讀從容。每援古誼以証時務。落汰良多。開明本心。一言一字的。切昭明聞者。感動其他論著。多有補於世教。凡矜夸粉飾峭刻奇險之語。一無有焉。非全於天而能若是乎。嗚呼。先君子往矣。遺編猶在。不肖孤尚不能窺其彷彿。又安能擬諸形容。惟是散落人間。兄弟相與裒輯。尚多闕畧。姑取其已彙次者。刻梓以惠後學。俾知有道有德之言。渾然天成。蓋若此。不肖孤尚未即死。庶幾旦旦熟復。以自警云。紹定初元八月既望。男朝奉郎權知衢

州軍州兼管內勸農事甫拜手書

真文忠公德秀作紹定江東荒政錄序云、紹定中、鄧山袁侯、
自衢守爲江東常平使者、既又直寶章閣、提點本道獄刑、兼
常平事、又以將作監召未行、進直煥章閣、因任嶺庾事、如初、
侯之在江左、於是五年矣、始至歲大旱、明年秋霜、蝗食稼、又
明年復旱、居數年間、屬州縣無一歲不告飢、侯無一日不講
荒政、訖事、侯之幕府、有纂其事而屬余以序者、余歎曰、此可
以觀天心矣、先儒有言、天於蓄變之將作、必豫出其人、以擬
之、若侯者、其天之所擬耶、蓋天之爲心、仁而已矣、然氣數之
運、參差不齊、又或生於人事之感召、則不幸而有垂殄焉、雖
非天心之所欲、而有不能免者、於是屬諸其人、使救之以濟
造化之所不及、庶乎歲雖凶而不至甚害、民雖飢且瘠而不

至盡委溝壑、此天心之所以爲至仁、而人心之仁所以與天爲一也。夫連一道八九州、旱而霜、霜而澇、澇而又旱、天變頻仍、可謂極矣。使無仁人以任其患、則生靈之命、必將糜滅、就盡而天心之仁不忍至是也。故以是屬之侯焉、而侯於荒政、猥猥然、惓惓然、寢爲之不寐、餽爲之不飽、其所區畫千條萬端、要不出於誠之一念。其爲民請命於朝者、以此。其諭官僚、勉里居、勸豪右者、亦以此。文檄之所形、詩歌之所諷、丁寧惻怛、吐出肺肝、聞者樂爲之盡力。侯嘗自謂一點赤誠、對越蒼昊者、信乎其然。此其所以能全一道之命、而副天心之所屬歟。方民之告病也、盜作於閩、未幾又作於衢、其距境皆不百里。侯不惟飽其民、且飽其師。凡防扞之計、無不至。於是境內之人、無隨和而疆外之寇、不得入。侯之有功於斯人、又大矣。

雖然侯之所爲亦不失其本心而已。本心者何？仁是也。夫天之與人以此心，未有不仁。而世之人往往流爲不仁者，違天而自賊者也。以侯之所爲，然後爲不失天之所與，則其安視斯人之飢且死而不爲之動，其得爲人乎？侯之荒政在江左者，其仁著於一時，而此錄之傳，使讀之者人人悟其本心而耻不侯若，則百世之仁也。故序而不辭。侯名甫，字廣微。

按正肅公所著書有孝說、孟子解、信安志、防拓錄等書，而江東荒政特其一耳。然公之有得於家學，上承陸子而發爲實心實政者，於此亦可見其端。而陸子之教，所謂言皆實言，行皆實行，隨處可驗。又世俗無識之士，妄謂朱陸異而不同，有若仇敵。故特錄真文忠公序文以明其妄。文忠得朱子之學於詹元善，自南宋以來號爲能昌明朱子之

學者無若真文忠其爲袁正獻公行狀既推崇不遺餘力而願師其德學爲正肅此序亦稱其爲天之所屬而推原其學於本心不惟不相詆而論學亦無不同後之爲朱陸異同之說者其造詣未能逮文忠公之百一而矢口狂論豈非小人而無忌憚者乎試讀文忠此文及正獻公行狀亦可以惕然而知所愧悔矣文忠又嘗爲正肅像贊云傳絜齋心得慈湖髓方寸之明照萬里是爲鄮山子袁子蓋正肅上承家學又兼師慈湖也正肅兄肅字晉齋真文忠公同年進士也師事舒文靖於新安仕蹟甚著弟商字可齋亦知名於時

馮興宗周之德二人亦慈湖門人籍貫官階無可考惟見於袁正肅公跋慈湖遺書云先生之言多矣門人馮興宗周之

行取訓詁之要。聚爲一編。屬甫刻梓。以惠後學。或者病所取
太少。甫語之曰。先生豈多言哉。先生居處無一惰容。接人無
一長語。作字無一草筆。立朝大節。正直光明。臨政子民。真如
父母。皆是先生純純皜皜之妙。先生嘗侍象山先生。發本心
之問。舉扇訟是非以答。忽省此心之清明。忽省此心之無始
末。忽省此心之無所不通。後守永嘉。謁先聖。謂自幼而學。壯
而始覺。覺此心湛然。虛明無體。廣大無際。日用云爲。無非變
化。嗚呼。先生之學。師先聖。師象山先生。吐於言辭的的真實。
一編已多矣。奚其少。

陳少宰墳 子少司寇蒙

宋史本傳

陳墳。字和仲。慶元府鄞人。大父叔平。與同郡樓鑰友善。死。鑰

哭之。塤纔四歲，出揖如成人。鑰指盤中銀杏，使屬對。塤應聲曰：金桃問何所據，對以杜詩鸚鵡啄金桃。鑰竦然曰：亡友不死矣。長受周官於劉著，頃刻數千百言輒就。試江東轉運使司第一，試禮部復爲第一。嘉定十年，登進士第，調黃州教授。喪父毀瘠，考古禮制，時祭儀制祭器行之，忽歎曰：俗學不足學。乃師事楊簡，攻苦食淡，晝夜不怠。免喪，史彌遠當國，謂之曰：省元魁數千人，狀元魁百人，而恩數踰等，盍令省元初授堂除教授，當自君始。塤謝曰：廟堂之議甚盛，舉自塤始，得無嫌乎。徑部注處州教授，以去。士論高之。理帝即位，詔求言。塤上封事云：上有憂危之心，下有安泰之象。世道之所由隆，上有安泰之心，下有憂危之象。世道之所由汙，故爲天下而憂，則樂隨之。以天下爲樂，則憂隨之。有天下者，在乎善審憂樂。

之機而已。今日之敝莫大於人心之不合。紀綱之不振。風俗之不淳。國敝人偷而不可救。願陛下養之以正。勵之以實。蒞之以明。斷之以武。而墮直聲始著於天下。與郡守高似孫不合去之。歸奉其母。召爲太學錄。踰年始至。轉對言天道無親。民心難保。日月逾邁。事會莫留。始之銳。久則怠。始之明。久則昏。垂拱仰成。盛心也。不可因以負有爲之志。遵養時晦。至德也。不可因以失乘時之機。上嘉納之。遷太學博士。主宗正寺簿。都城火。墮步往玉牒所。盡藏玉牒於石室。詔遷官。不受。應詔言。應上天非常之怒者。當有非常之舉動。歷陳致災之由。又有吳潛汪泰亭上彌遠書。乞正馮櫟王虎不盡力救火之罪。及行知臨安府林介兩浙轉運使趙汝憚之罰。人皆壯之。遷太常博士。獨爲袁燮議謚。餘皆閣筆。因歎曰。幽厲雖百世。

不改諡有美惡。豈諛墓比哉。會朱端常子乞諡。塤曰。端常居臺諫。則逐善類。爲藩牧。則務刻剝。宜得惡諡。以戒後來。乃諡曰榮愿。議出。宰相而下。皆肅然改容。考功郎陳耆覆議合。宦者陳洵益欲改。塤終不答。李全在楚州。有異志。塤以書告。彌遠痛加警悔。以答羣心。早正典刑。以肅權綱。大明黜陟。以防政體。不納。未幾賈貴妃入內。塤又言。乞去君側之蠱媚。以正主德。從天下之公論。以新庶政。彌遠召塤問之。曰。吾甥殆好名耶。塤曰。好名孟子所不取也。夫求士於三代之上。惟恐其好名。求士於三代之下。惟恐其不好名耳。力勾去。添差通判嘉興府。彌遠卒。召爲樞密編修官。入對。首言天下之安危在宰相。南渡以來。屢失機會。秦檜死。所任不過萬侯。高沈該耳。侂冑死。所任史彌遠耳。此今日所當也。次言內廷當嚴宦者。

之禁外廷當嚴臺諫之選。於是洵益陰中之監察御史王定
劾。塤出知常州。改衢州。寇卜日發。深坑遵江山而東。塤獲謀
者。即遣人致牛酒。諭之曰。汝不爲良民而爲刼盜。不事耒耜
而弄甲兵。今享汝牛酒。冀汝改業。否則殺無赦。於是自首者
日以百數。獻器械者重酬之。遂以潰散。改提點都大坑冶。徙
福建。轉運判官。侍御史蔣峴常與論中庸不合。又劾之。主管
崇道觀。踰年遷浙西提點刑獄。歲旱盜起。捕斬之。盜懼徙去。
安吉州俞垓與丞相李宗勉連姻。恃勢黷貨。塤按臨之。弓手
戴福以獲潘丙功爲副尉。宗勉倚之爲腹心。盜橫貪害。塤至。
福聞風而去。貽書宗勉曰。塤治福所以報丞相也。傳聞實走
丞相。賢輔弼不宜有此。宗勉答書曰。福惡貫盈。非君不能治。
宗勉雖不才。不敢庇姦凶。惟君留意。及獲福豫章。衆皆欲殺。

之。頃曰：若是，則刑濫矣。乃加墨徇於市，囚之園土，以吏部侍郎召。及爲國子司業，諸生咸相慶，以爲得師。未幾，兼玉牒檢討、國史編修、實錄修撰，乃辭兼史館，歷陳境土之蹙、民生之艱、國計之匱。既無經理圖回之素，惟有感動轉移之策，必有爲之本者。本者何？復此心之妙耳。又言履泰安而逸樂者，有習安致危之理；因艱危而兢懼者，有慮危圖安之機。明用舍以振紀綱，躬節儉以汰冗濫，屏姦妄以勵將士，抑貴近以寬糴糴，結鄉社以防竊發，黜增剝以培根本。今任用混殽，薰蕕同器，遂使賢者耻與同羣。諫議大夫金淵見之，怒，頃乞補外，不許。又辭免和糴轉官賞，亦不許。知溫州，未上，以言罷。頃家居時，自娛於泉石，四方學者踵至，輕財急義，明白洞達，一言之出，終身可復。忽臥疾，戒其子抽架上書占之，得呂祖謙文。

集其墓誌曰。祖謙生於丁巳歲。沒於辛丑歲。塋曰。異哉。我生於慶元丁巳。今歲在辛丑。於是一甲矣。吾死矣。夫子蒙年十八。上書萬言論國事。吳子良奇之。妻以女。爲太府寺主簿。入對。極言賈似道爲相。時國政闕失。文多不錄。爲淮東總領。似道誣以貪汙。貶建昌軍簿。錄其家。惟青氍毹耳。德祐初。禮部侍郎李珣乞放便。以刑部侍郎召。不赴。卒。

序跋文畧

理宗紹定五年秋閏九月八日。賜象山書院額。以尚書劄壽諸石。時和仲爲浙帥。跋劄後云。象山文安先生。明本心之旨。啓千古之秘。開警羣迷。迓續道統。如日月之昭揭。太嶽之表鎮也。於是四方儒彥。從者如雲。其尤碩大光明者。則有慈湖文元楊先生。絜齋正獻袁先生。淵澄峻發。木鐸鏗鐃。于以昌。

我宋文明之治云云

嘉熙元年丁酉秋七月、和仲爲泉使、刻先生語錄、自爲序、其畧云、孟子歿千五百餘年、宋有象山文安陸先生挺然而生、卓然而立、昭然而知、毅然而行、指本心之清明、斯道之簡易、以啓羣心、詔後學、其教不務繁而本末備、其辭不務多而倫要明、洗章句之塵、破意見之窟、使聞者渙如、躍如、知心之即道而不疑、其所行茲非晦冥之日、月崖險之津、塗邱阜之嵩華歟、塤生晚、不逮事先生、而登慈湖之門、固嘗服膺遺文矣、蒙恩司道治、由書院瞻謁祠像、如獲執經、升堂見同門所錄訓語、編未入梓、咸以爲請、再拜三復、乃授工鋟勒焉、或謂塤曰、近世儒生、闡說其徒、競出紀錄、後來者搜拾摹傳、雖汗牛充棟、且未厭止也、子之所得、不甚鮮約乎、塤語之曰、先生之

道如青天白日何庸語先生之語如震雷驚霆何庸錄錄而刊猶以爲贅也而今而後有誦斯錄能於數千言之中見一言焉又於其中見無言焉則先生之道明矣敢拱以俟來者和仲一號習菴黃文潔震論云近世慈湖先生楊文元公敎學者專指心之精神是謂聖或者亦不無疑焉然此語於傳謂吾夫子所以敎子思也使之推數究理周其所察則精神云者正其心之用與世之攝置此心於無用者正相南北與程子所謂存心愛物者正自符契故慈湖爲郡敎化興行習菴學於慈湖愛人利物之政至今盪人耳目要其行事則可以推其所以言心者矣

袁正肅甫題習菴觀聚堂云習菴築室扁曰觀聚堂前何有萬象可觀山如郭郭烟雲春吐草木沃若春光媚嫵修篁漫

山不知隆暑。何況秋空。呼日入戶。朔風吹雪。松聲如怒。上天。下地。四方曰宇。物生其間。何可勝數。我於是觀樂哉。斯土。隨意作室。不華不窳。買山旋添。稍葺園圃。得趣幽閒。不入城府。良朋偶來。傾倒肺腑。不及時事。惟談鄒魯。朋去何爲。周易一部。消息盈虛。窮今亘古。觀乃自觀。寂無一語。又題其尊明亭云。非德不尊。非道不明。爰取斯義。以明吾亭。亭在山巔。氣象巍然。山從何來。蜿蜒蜿蜒。我坐亭上。極目一望。羣峰畢朝。尊無與抗。我撫亭下。萬狀難寫。一一分明。入我醖筭。有時携筇。偕二三朋。莫知我心。獨撫孤松。

錢秘閣時

子柏從子允文

宋儒學案本傳

錢時字子是淳安人。幼奇偉不凡。讀書不爲世儒之習。以易

冠漕司既而絕意科舉。究明理學。江東提刑袁甫建象山書院。招主講席。學者興起。大抵發明人心。指摘痛快。聞者皆有得焉。政事亦多所裨益。丞相喬行簡薦之。授秘閣校勘。詔守臣以其所著書來上。未幾出佐浙東倉幕。召入史館檢閱。以江東帥屬歸。所著書有周易釋傳。尚書演義。學詩四書管見。春秋大旨。兩漢筆記。蜀阜集。冠昏記。百行冠冕集。人稱爲融堂先生。

按宋史本傳與此傳畧同。此傳脫二語。今增入。

慈湖爲錢子是誌其妣徐氏墓云。某於淳安錢子名時字子是至契。子是已覺。惟尚有微礙。某刻其礙。遂清明無間。無內外。無終始。無作輟。日月光照。精神澄靜。某深所敬愛。後遣家子柏奉書至。并其妣徐氏家傳。紀其孝敬。燭疑如見。族人事。

有難決就問一言而定闔閭不嚴而治歲大歉數日杵米給鄰里有生子貧不舉者急諭止之給以酒米其救活餓死不可殫紀棺梧野灰捐地數畝爲蒿里其夫號筠坡翁字晦仲吳越文穆王九世孫夫婦德同行合予是起敬誌銘其墓某與子是亦嘗爲至契銘其親墓今思孔子書嗚呼有吳延陵季子之墓異乎後世繁辭某已戒子孫我死後毋爲誌銘子是欲其孝妣之善譽垂於不朽予是之子柏字誠甫亦近於嘉

慈湖贈錢誠甫帖云誠甫遠訪從容近日問答亦詳將歸侍復求言孔子曰天有四時春秋冬夏風雨霜露無非教也地載神氣神氣風霆風霆流形庶物怒生無非教也誠甫領斯教矣毋或昏

象山學案云錢允文號竹間淳安人錢時之從子也登咸淳九年進士第知武岡縣受學於時

羅寶章必元

宋史列傳

羅必元字亨父隆興進賢人嘉定十年進士調咸寧尉撫州司法叅軍崇仁丞復攝司法郡士曾極題金陵行宮龍屏迺丞相史彌遠謫道州解吏窘極甚必元釋其縛使之善達真德秀入叅大政必元移書曰老醫嘗云傷寒壞證惟獨參湯可救之然其活者十無二三先生其今之獨參湯乎調福州觀察推官有勢家李遇奪民荔支園必元直之遇爲言官以私憾罷之知餘干縣趙福王府驕橫前後宰貳多爲擠陷至是以汝愚墓占四周民山亦爲直之言於州曰區區小官罷

去何害。人益壯其風力。淳祐中。通判贛州。賈似道總領京湖。尅剝至甚。必元上疏。以爲蠹國脉。傷民命。似道銜之。改知汀州。爲御史丁大全按去。後起幹行在糧料院。錢塘有海鯨爲患。漂民居。詔方士治之。都人鼓扇成風。必元上疏力止之。帝召見曰。見卿梅花詩。足知卿志。度宗即位。以直寶章閣兼宗博士。致仕。卒年九十一。必元嘗從危稹。包遜學。最爲有淵源。見理甚明。風節甚高。今鄉人猶尊慕之云。

按羅亨父師事包敏道。其調護曾景建之戍。毅然釋其繫。而遣之。尤爲同鄉所重。蓋實有得於陸子之教。故能臨事卓然。毫不惑於利害也。

鄧侍郎泳

撫州府志本傳

鄧泳字德載。父約禮。從學於象山先生。泳早承家學。登嘉定十三年進士。授分寧簿。居荊湖制置司幕下。再調江陵錄叅。改新建令。上都堂稟議。除太社令。淮西制機幕。兼沿江制司叅議。加軍器監簿。措置江防。及齊安告急。往見孟珙。勉以力疾出戰。洎奏功。珙曰。鄧制叅第一。除太常丞。知鄂州。兼沿江制置副使。屢遷右文殿修撰。同修國史。遷刑部侍郎。會天變。求言。泳奏愛惜根本。愛惜人才。愛惜日力。切中時務。仕終通議大夫。自號巽坡。居官所至。以廉見稱。晚歲坐累。遷謫。卒年六十九。泳爲橘園李侍郎浩之甥。入史館。遷刑部。宦籍皆相踐云。

饒秘監應子

從弟安撫應龍

撫州府志本傳

饒應子字定夫。延年長孫也。延年師陸子。教子孫世守其學。應子紹定五年進士。歷岳州教授。監封樁上庫。改知新建。辟知定城縣。寶祐五年。除太學錄。陞博士。開慶元年。進國子博士。遷秘書郎。兼國子編修。九月。權兼察御史。兼崇政殿說書。時江西湖北湖南皆受兵。詔淮西赴援。應子行次江上。手疏淮不可弛備。宜留兵牽制。上從之。或請移蹕。朝堂聚議。應子奮筆曰。誰爲此謀。宜斬。又言。洪天錫有犯無隱。監學小臣徐庚金輩叩闕去國。宜旌異之。累疏。丁大全董宋臣等罪。景定初。遷大理少卿。改秘少監。未幾。以何夢熊論罷去國。年五十有七。所著有南麓集三十卷。

饒應龍字翔夫。延年孫。應子從弟。與應子並承家學。端平二年進士。初主餘干簿。馬裕齋趙節齋交薦於朝。改知德化縣。

丁大全當國。欲處以要官。拒不出。理宗擢用不附丁者。除監察御史。首條陳敬天愛民用人聽言四事。及戒貢羨餘。明日果有帥臣獻方物者。上怒却之。在臺端風力甚勁。或勸其婉言。公曰。言官其可婉耶。竟以不合罷歸。未幾提刑江東。改浙西。披閱案牘。或終夜不寐。遷直顯謨閣。知紹興府。兼浙東安撫。剏萬年倉以惠飢民。年六十卒於官。所著有詩文類編六十卷。史討三十卷。盡心錄三十卷。奏稿三卷。行於世。

羅運判愚

撫州府志本傳

羅愚。字季能。文恭點子。以遺澤補官。除藉田令。補外得與國軍。陛辭。陳三說以講正學親忠賢爲本根。以尊道揆重言責爲綱領。以獎忠正顯靜退。褒介潔示節儉省浮冗爲規模。上

嘉納以清勤褒之。至郡值歲飢，賑恤有方。遷湖南憲使，創雄楚軍以弭寇，改廣西運判，除鹽法害民者，作清勤堂。高定子爲箴，表端平聖訓也。自號北林，卒年五十七，愚恪守家學，行誼純固，政術循良，生平召除之命十有五，而辭者十有一，出處裕如。真西山魏了翁亟稱之，蓋陸子之餘波所及也。

趙郡王希館

宋史本傳

趙希館，字君錫，舊名希喆，登慶元二年進士第，改賜今名。少扶父喪歸，道遇寇，左右駭散，希館拊棺慟哭，不懼。寇義而去，學於陳傅良、徐誼，既舉進士，調汀州司戶。峒寇李元礪方起，行人震懼，郡會僚佐議守城，希館下坐，無一語，守異之，曰：「不言得毋有所見乎？」希館曰：「守城非策，距城三十里有關，曰古

城若悉精銳以扼其衝。賊不足慮矣。守以付希館。人爲危之。希館至關。審形明間。申令謹候。分畫粗定。賊已遣謀窺關。希館得謀。詰之。縱其去。舉火相示。而羸師以誤之。夜半賊數百銜枚突至。希館嚴兵以待。賊且至。始命矢石俱下。賊無一免。餘黨聞風而遁。希館引還。老稚羅拜相屬。希館由他道以避之。事聞。詔升州推官治疑獄。決滯訟。攝下邑。弭亂卒。去之日。軍民遮道泣送者數十里。調主管夔州路轉運司帳司。疏大寧鹽井利病。使者上諸朝。民便之。改知玉山縣。未行。召對。希館首言民力困於貪吏。軍力困於債帥。國家之力。則外困於歸附之卒。內困於浮冗之費。次論西蜀銓科舉之弊。次論大寧鹽井本末。寧宗嘉納之。授大理寺丞。遷大宗正丞。權工部郎官。宗姓多貧。而始生有訓。名爲人。後有過禮。吏受賕亡藝。

莫敢自陳。希館白其長推行之。會朝議燕邸近屬赴朝參者少。命希館易班。希館力辭弗克。特換授吉州刺史。提舉佑神觀。未幾。廷臣言宗姓換班人常舉進士。請視朝士聽輪對。於是希館次對時。首論今日多事之際。而未有辦事之人。朝紳清選也。以緘默爲清重。以刻薄爲舉職。以無所可否爲識體。閫寄重任也。以大言爲有志。以使過爲知恩。臣非敢厚誣天下。以爲無人。患在選擇未得其道。器使未當其才。爾授成州團練使。賜金帶。令服紫。以寶璽推恩。進和州防禦使。理宗即位。進潭州觀察使。以公族近邸。恩特加厚。又進安德軍承宣使。希館引對言。初政急務。莫先於明道總治。統收人心。上爲動容。越明年。論祠祭不蠲。禁衛不肅。慈明宮上壽。升節度。封信安郡公。卒。遺奏聞。上震悼。輟視朝。賜舍歛。贈以金幣。希館

人。之。恩。居。官。祁。寒。盛。暑。未。嘗。謁。告。衣。食。取。裁。足。而。已。追。封。信。安。郡。王。

按信安學於徐文忠公誼。其授受緒言莫考。然觀史傳稱其告理宗以初政急務莫先明道。則其平素用功於道學亦匪淺矣。

趙忠憲公與憲從弟與明

宋史本傳

趙與憲字德淵。大祖十世孫。居湖州嘉定。十三年進士。歷官差主管官告院。遷將作監主簿。差知嘉興府。遷知大宗正兼權樞密院檢詳諸房文字。尋爲都官郎官。加直寶章閣。兩浙轉運判官。進煥章閣知慶元府。主管沿海制置司公事。拜司

農少卿仍兼知慶元府兼沿海制置副使遷浙西提點刑獄授中書門下省檢正諸公事拜司農卿知臨安府主管浙西安撫司公事權刑部侍郎兼詳定勅令官權兵部侍郎遷戶部侍郎權戶部尚書時暫兼吏部尚書尋爲真兼戶部尚書時暫兼浙西提舉常平加端明殿學士提領戶部財用皆依舊兼知臨安府與執政恩澤加資政殿大學士以觀文殿學士知紹興府浙東安撫使知平江府兼淮浙發運使時暫兼權浙西提點刑獄授沿江制置使知建康府江東安撫使馬兵軍都總管兼行宮留守節制和州無爲軍安慶府三郡屯田使時暫兼權揚州兩淮安撫制置使改兼知揚州尋兼知鎮江府兼淮東總領提舉洞霄宮復爲淮浙發運使差知平江府特轉兩官致仕景定元年八月卒特贈少師與憲所至

急於財利。幾於聚歛之臣矣。

按寧波府志與憲本傳稱其初居青田。慕楊文元公簡倡道學於慈溪。不遠千里。因從弟與明詣門受業。得其心學。至歷官司農少卿時。兼知慶元府沿海制置副使。因度縣地之湖北。創立慈湖書院。以崇祀文元公。又申聞其事於朝。設立書院山長。諸生誦法之盛。與宋相終。又自青田徙居慈溪。其心悅誠服。倡明師學。不亞於錢融堂時。陳和仲損矣。又稱其於嘉熙中。知平江府。郡中飢。分場設粥。以寓公方萬里。董其事。全活數萬人。行飲射禮於學宮。廣絃誦。以嚴教養。學宮子弟爲立生祠。其惠政感人如此。而宋史目以聚歛。其信然耶。聚歛必有其實。傳中並未指出其若何聚歛。豈以吳丞相潛疏言沈炎爲與憲腹心。爪牙甘爲。

搏擊云云。故滋物議耶。是時元兵渡江。國事已危。軍需旁
午。與憲身爲宗臣。催科嚴切。以濟時艱。容或有之。且潛亦
爲炎論罷。則相惡之言。未可爲據。又稱其卒諡忠憲。史傳
亦不載。惟見於本紀而已。其先居青田。後徙慈溪。子孫現
家其地。府志必無舛錯。而史傳止稱其居湖州。則亦誤矣。
宋史成於元之中葉。時方崇尚朱子。排詆陸子之學。以吳
文正。虞文靖二公之賢。時論猶以陸學爲疑。使不得安於
冑監。則已往之爲陸學者。橫遭誣讎。固其所也。故存宋史
本傳。以備忠憲官階。而復叅以寧波府本傳。而論之如此。
至於吳丞相潛。與兄叅政淵。並學於鄒奉議斌。蓋亦陸子
門人。而疏論忠憲甚厲。亦如東坡目伊川爲奸。意見偶不
相合。則不能不異。而各成其爲君子。不相妨。亦正不必強

同也。

慈湖書雲萍錄趙德淵親書後云。輿論謂數年前極有性氣。及爲僉判。全不見有性氣。永嘉徐良甫與德淵至稔熟。言其喜怒不形於色。同徐良甫從少保墳所從容幾日。德淵忽於早食前驚曰。異哉。良甫問狀。於是知其有覺。某後見德淵。德淵曰。與篋今於日用應酬。都無一事。只未知歸宿之地。某曰。不必更求歸宿之地。孔子曰。心之精神是謂聖人。皆有是心。心未嘗不聖。何必更求歸宿。求歸宿乃起意。反害道。孔子每戒學者毋意。後再見德淵。果平平不動乎意。

吳叅政淵

宋史本傳

吳淵字道父。秘閣修撰。柔勝之第三子也。幼端重寡言。苦志。

力學。五歲喪母。哭泣哀慕如成人。嘉定七年舉進士。調建德縣主簿。丞相史彌遠館留之。語竟日。大悅。謂淵曰。君國器也。今開化新置尉。即日可上。欲以此處君。淵對曰。甫得一官。何敢躁進。况家有嚴君。所當稟命。彌遠爲之改容。不復強。至官。就辟令江東九郡之冤訟於諸使者。皆乞送淵。改差江東制置使司幹辦公事。丁父憂。詔以前職起復。力辭。弗許。再辭。且貽書政府曰。人道莫大於事親。事親莫大於送死。苟冒哀求榮。則平生大節已掃地矣。他日何以事君。時丞相史嵩之方起復。或曰。得毋碍時宰乎。淵弗顧。詔從之。服除。差浙東提舉茶鹽司幹辦公事。尋改鎮江府節制司沿江制置使司幹辦公事。皆不就。知武陵縣。改楊子縣。兼淮東轉司幹辦公事。添差通判真州。入爲將作監丞。遷樞密院編修官。兼刑部郎官。

再遷秘書丞仍兼刑部郎官以直煥章閣知平江府兼節制
許浦水軍提點浙西刑獄會衢嚴盜起警報至調遣將士招
捕之殲其渠魁散其支黨以功爲樞密院檢詳諸房文字兼
國史編修官實錄院檢討官兼左司進右文殿修撰樞密副
都承旨兼右司兼檢正適政府欲用兵中原以據關守河爲
說淵力陳其不可大約謂國家力決不能取縱取之決不能
守丞相鄭清之不樂而罷出知江州改江淮荆浙福建廣南
都大提點坑冶都司袁商令御史王定劾淵罷侍御史洪咨
夔不直之劾定左遷未幾邊師果如淵言清之致書引咎
謝差知鎮江府定防江軍之擾兼淮東總領以功遷太府少
卿復以總領兼知鎮江加集英殿修撰知鎮江兼總領進權
工部侍郎職任如舊權兵部侍郎權戶部侍郎再爲總領兼

知鎮江時淵造闕下入對歷陳九事甫下殿御史唐璘擊之璘蓋淵所薦者也遂仍前職提舉太平興國宮久之加寶章待制再起知鎮江兼總領未幾以戶部侍郎兼知鎮江府召行在以寶章閣直學士知太平州尋兼江東轉運使時兩淮民流徙入境者四十餘萬淵亟加慰撫而賑濟之使之什伍令土著人無相犯旁郡流民焚劫無虛日獨太平境內肅然無敢譁者以功加華文閣直學士沿海制置使知慶元府不赴以工部尚書沿海制置副使知江州亦不赴升華文閣學士知隆興府江西安撫使兼轉運副使會歲大穰講行荒政全活者七十八萬九千餘人徙知潭州湖南安撫使不赴加敷文閣學士仍知隆興府安撫轉運副使如故改知鎮江府兼都大提舉浙西沿海諸州軍許浦澈浦等處兵船歲亦

大禋。因淵全活者六十五萬八千餘人。左正言三疏劾淵奪職。尋復職。提舉太平興國宮。未幾改鴻慶宮。丁母憂服除。進龍圖閣學士。江西安撫使。兼知江州。尋爲沿江制置副使。兼提舉南康軍兵甲公事。節制蘄黃州安慶府屯田使。湖南峒寇蔓入江右之境。破數縣。袁洪大震。淵命將調兵生擒其渠魁。亂遂平。遷兵部尚書。知平江府。兼浙西兩淮發運使。尋兼知平江府。歲亦大禋。因淵全活者四十二萬三千五百餘人。兼浙西提點刑獄。知太平州。兼提領兩淮茶鹽。所以功進。端明殿學士。沿江制置使。江東安撫使。兼知建康府。兼行宮留守。節制和州。無爲軍安慶府。兼三郡屯田使。朝廷付淵以光豐蘄黃之事。凡剏司空山燕家山金剛臺三大砦。嵯峨山鷹山什子山等二十二小砦。圍丁壯置軍。分立隊伍。星聯棋布。

脉絡貫通。無事則耕。有警則禦。詔以淵興利除害。所列二十有五事。究心軍民。拜資政殿大學士。職任如舊。與執政恩例。封金陵侯。復賜錦繡堂忠勤樓大字。進爵爲公。徙知福州。福建安撫使。改知平江府。兼發運使。御史劉元龍劾淵。帝寢其奏。改知寧國府。累具辭免。且旬辭。以本官提舉洞霄宮。起知潭州。湖南安撫使。不赴。改知太平。兼提領江淮茶鹽所。荆湖制置大使。知江陵府。兼夔路策應大使。兼京湖屯田大使。帶行京湖安撫制置大使。拜觀文殿學士。職任如舊。兼總領湖廣江西京西財賦。湖北京西軍馬錢糧。淵調兵二萬。往援川蜀。其後力戰於白河沮河。王泉。寶祐五年正月朔。以功拜叅知政事。越七日卒。贈少師。賻銀絹以五百計。淵有材畧。迄濟事功。所至興學養士。然政尚嚴酷。好興羅織之獄。籍入豪橫。

故時有蜈蚣之謠其弟潛亦數諫止之所著易解及退菴文集奏議

吳丞相潛

宋史本傳

吳潛字毅夫宣州寧國人秘閣修撰柔勝之季子嘉定十年進士第一授承事郎簽鎮東軍節度判官改簽廣德軍判官丁父憂服除授秘書省正字遷校書郎添差通判嘉興府權發遣嘉興府事轉朝散郎尚書金部員外郎紹定四年遷尚右郎官都城大火潛上疏論致災之由願陛下齋戒修省恐懼對越菲衣惡食必使國人信之毋徒減膳而已疎損聲色必使天下孚之毋徒徹樂而已閹官之竊弄威福者勿親女寵之根萌禍患者勿昵以暗室屋漏爲尊嚴之區而必敬必

戒以恒舞酣歌爲亂亡之宅。而不淫不佚。使皇天后土。知陛下有畏之之心。使三軍百姓。知陛下有憂之之心。然後明詔二三大臣。和衷竭慮。力改絃轍。收召賢哲。選用忠良。貪殘者屏。回衷者斥。懷姦黨賊者誅。賈怨誤國者黜。毋並進君子小人。以爲包荒。毋兼容衰。說正論以爲皇極。以培國家一綫之脉。以救生民一旦之命。庶幾天意可回。天災可息。弭災爲祥。易亂爲治。又言重地要區。當豫畜人才。以備患。論大順之理。貫通天人。當以此爲致治之本。又貽書丞相史彌遠論事。一曰格君心。二曰節奉給。三曰賑恤都民。四曰用老成廉潔之人。五曰用良將。以禦外患。六曰革吏弊。以新治道。授直寶章閣。浙東提舉常平。辭不赴。改吏部員外郎。兼國史編修。實錄檢討。遷大府少卿。淮西總領。又告執政。論用兵復河南。不可。

輕易。以爲金人既滅。與北爲鄰。法當以和爲形。以守爲實。以戰爲應。自荆襄首納空城。合兵攻蔡。兵事一開。調度寢廣。百姓狼狽。死者枕籍。使生靈腦肝塗地。得城不過荆榛之區。獲俘不過曖昧之骨。而吾之內地荼毒如此。邊臣誤國之罪。不待言矣。聞有進恢復之畫者。其算可謂俊傑。然取之若易。守之實難。征行之具。何所取資。民窮不堪。激而爲變。內郡率爲盜賊矣。今日之事。豈容輕議。自後興師入洛。潰敗失亡不貲。潛之言率驗。遷大府卿兼權沿江制置。知建康府。江東安撫留守。上疏論保蜀之方。護襄之策。防江之算。備海之宜。進取有甚難者三事。端平元年。詔求直言。潛所陳九事。一曰顧天命。以新立國之意。二曰植國本。以廣傳家之慶。三曰篤人倫。以爲綱常之宗主。四曰正學術。以還斯文之氣脉。五曰廣畜

人才以待乏絕。六曰實恤民力，以致寬舒。七曰邊事當鑒前轍，以圖新功。八曰楮幣當權新制，以解後憂。九曰盜賊當探禍端而圖善策，以直論忤時相罷。奉千秋鴻禧祠，改秘閣修撰。權江西轉運副使，兼知隆興府，主管江西安撫司，擢太常少卿，奏造斛斗輪諸郡租，寬恤人戶，培植根本。凡十五事進右文殿修撰，集英殿修撰，樞密都承旨，督府叅謀官，兼知太平州。五辭不允。又言和戰成敗大計，宜急救襄陽等事，貽書執政，論京西既失，當招收京淮丁壯爲精兵，以保江西。權工部侍郎，知江州，辭不赴，請養宗子以係國本，以鎮人心。改權兵部侍郎，兼檢正，論士大夫私意之蔽，以爲衰漢潰決興沔破亡兩淮俶擾三川陷沒，欲望陛下念大業將傾，士習已壞，以靜專察羣情，以剛明消衆慝，警於有位，各勵至公，毋以術

數相高。而以事功相勉。毋以陰謀相訐。而以識見相先。協謀并智。戮力一心。則危者尚可安。而衰證尚可起也。又請分路取士。以收淮襄之人物。試工部侍郎。知慶元府。兼沿海制置使。改知平江府。條具財計。凋弊本末。以寬郡民。與轉運使王埜。爭論利害。授寶謨閣待制。提舉太平興國宮。改王隆萬壽宮。試戶部侍郎。淮東總領。兼知鎮江府。言邊儲防禦等十有五事。改寶謨閣直學士。兼浙西都大提點坑冶權兵部尚書。浙西制置使。申論防拓江海團結措置等事。進工部尚書。改吏部尚書。兼知臨安府。乃論艱屯蹇困之時。非反身修德。無以求亨通之理。乞遴選近族。以係人望。而俟太子之生。帝嘉納。兼侍讀經筵。以臺臣徐榮叟論列。授寶謨閣學士。知紹興府。浙東安撫使。辭。提舉南京鴻慶宮。遂請致仕。授華文閣學士。

士知建寧府。辭丁母憂。服除。轉中大夫。試兵部尚書兼侍讀。轉翰林學士。知制誥兼侍讀。改端明殿學士。簽書樞密院事。進封金陵郡侯。以亢旱乞罷免。改資政殿學士。提舉洞霄宮。改知福州。兼本路安撫使。徙知紹興府。浙東安撫使。召同知樞密院兼叅知政事。入對。言國家之不能無敝。猶人之不能無病。今日之病。不但倉扁望之而驚。庸醫亦望而驚矣。願陛下篤任元老。以爲醫師。博采衆益。以爲醫工。使臣輩得以效牛溲馬勃之助。以不辱陛下知人之明。淳祐十一年。入爲叅知政事。拜右丞相兼樞密使。明年。以水災乞解機政。以觀文殿大學士提舉洞霄宮。又四年。授沿海制置大使。判慶元府。至官。條具軍民久遠之計。告於政府。奏皆行之。又積錢百四十七萬三千八百有奇。代民輸帛。前後所蠲五百四十九萬。

一千七百有奇。以久任可祠。且累章乞歸田里。進封崇國公。判寧國府。還家。以醴觀使兼侍讀召入對。論畏天命。結民心。進賢才。通下情。帝嘉納。拜特進左丞相。進封慶國公。奏乞令在朝之臣各陳所見。以決處置之宜。改封許國公。大元兵渡江。攻鄂州。別將由大理下交趾。破廣西。湖南諸郡潛奏令鄂渚被兵。湖南擾動。推原禍根。良由近年姦臣佞士。設爲虛議。迷國誤軍。其禍一二年而愈酷。附和逢迎。嬖阿諂媚。積至於大不靖。臣年將七十。捐軀致命。所不敢辭。所深痛者。臣交任之日。上流之兵已踰黃漢。廣右之兵已蹈柳賓。謂臣壞天下之事。亦可哀矣。又論國家安危治亂之原。蓋由近年公道晦蝕。私意橫流。仁賢空虛。名節喪敗。忠嘉絕響。諛佞成風。天怒而陛下不知。人怨而陛下不察。稔成兵戈之禍。積爲宗社之

憂章鑑高鑄嘗與丁大全同官傾心附麗躡躑要途蕭泰來等羣小嚙脊國事日非浸淫至於今日陛下稍垂日月之明毋使小人翕聚以貽善類之禍沈炎實趙與憲之腹心爪牙而任臺臣甘爲之搏擊姦黨盤據血脉貫穿以欺陛下致危亂者皆此小人爲之又乞令大全致仕炎等與祠高鑄羈管州軍不報屬將立度宗爲太子潛密奏云臣無彌遠之材忠王無陛下之福帝怒潛卒以炎論劾落職命下中書舍人洪芹繳還詞頭不報謫建昌軍尋徙潮州責授化州團練使循州安置潛預知死日語人曰吾將逝矣夜必雷風大作已而果然四鼓開霽撰遺表作詩頌端坐而逝時景定三年五月也循人聞之咨嗟悲慟德祐元年追復元官仍兼執政恩數明年以太府卿柳岳請贈諡特贈少師

按二吳之父名在偽學之籍。與文元袁正獻同列。又延鄒奉議斌教其二子。故叅政與丞相實心實學。發爲功業。照耀一時。叅政力辭起復。丞相論反身修德。皆有得於講學。而合於奉議所稱象山第一義者也。

寧波志名宦傳有宋史所未備者云。潛出入朝省不常。初以試工部侍郎知慶元府兼沿海制置使。後復以觀文殿大學士沿海制置大使判慶元府。首先加惠庠序。篤意教養。以學供日繁。庖饔不足。乃於常餼外日增給錢一百二十貫。分齋造食。官給權量。俾齋隸各以時值取於市。復撥沒官田產歸之學。以廣樂育。嘗出所輯孔孟格言及所製存悔齋箴。徧惠來學。凡學計不續支移。那給有請必俞。諸生感之。肖像祠於石室。郡城不飭有憑城而樓觀者。巡徼之途遂塞。潛乃芟夷。

荆秦闕者補圯者埴低薄者崇益剏巡鋪寘卒以羅鼎建義和永豐朝京三門而甬水靈橋東渡悉繕治之先是制置使司歲調明溫台三郡民船防定海戍淮東京口船在籍者率多損失每按籍科調吏並緣爲姦民甚苦之潛立爲義船法令三郡部縣各選鄉之有材力者以主團結如一都歲調三舟而有舟者五六十家則衆六舟半以應命半以自食其利有餘貲俾蓄以備來歲用凡丈尺有則印烙有文調用有時著爲成式其船專留江滸不時輪番下海巡緝船戶各欲保護鄉井競出大舟以聽調發且日於三江合兵民船閱之環海肅然設永平寨於夜飛山統以偏校餉以生券給以軍艦使漁戶有籍而行旅無虞設向頭寨外防倭麗內蔽京師又立烽燧分爲三路皆發軔於招寶山一達大洋壁下山一達

自嘉寨一達本府看教亭。從亭密傳一牌。竟達轅帳。而沿江
沿海。號火疾馳。觀者悚懾。故理宗諭之曰。已書再考。郡綱振
飭。海道肅清。非虛語也。潛尤究心水利。於郡城平橋立水則
刊平字於石。視字之出沒爲啓閉。遇淫潦輒委官啓閘泄水。
民免墊溺。他山洪水灣隄崩河決。即其地爲三壩。西七鄉無
復旱暵之憂。懇管山河導西江二百餘里之水。匯於茅針礪。
鄧慈定皆沾其利。已又礪鄧之棟木礪永豐礪開慶堰。鄭郎
堰北津堰西渡築江東道頭。以濟浮梁所不及。堰慈谿之雙
河。使越人不得以鄰爲壑。堰黃家閘支浦。又爲黃泥埭爲新
堰。爲新壩造高橋。凡諸邑淤河淺港。悉浚治之。重修驛路。至
今有相公衢。吳公塘之頌。置永豐倉。準常平之法。建惠院一
百五間。合六廂之鰥寡。孤獨瘖聾跛躄者三百人廩之。開惠

民藥局。歲以春夏施其劑餌。三年之間。雨暘常愆期。潛無時
不禱。有禱輒應。屢致豐稔。麥有三穗之瑞。民甚德之。嘗自爲
詩曰。數莖半黑半白髮。一片
潛憂先天下。剛直敢言。其奏疏及與宰相論辯。忠憤激烈。皆
人所不敢聞者。先以忤時相罷奉祠。既而賈似道銜之不已。
安置循州。乃除其私人劉宗申知循州。屬以黃祖之事。百計
殺之。潛預知死日。循人咨嗟悲慟。

徐都曹愿

寧波府志本傳

徐愿字恭先。昌國人。遊太學。一時文辭爲倫輩所重。登開禧
元年進士第。居官以廉蒞事。以勤。後除福建提舉。適黃勇寇
省。縮頸退避。愿獨晏然無懼色。且爲婉言撫喻。寇乃列

拜於前事。平入爲右司兼都曹人。謂愿嘗受業於絜齋。故其
政事文學有自來矣。

四

無怒軒

陸子學譜卷之十七

南昌萬承蒼訂

後學臨川李紱編

平越王士俊校

門人下

袁太師韶

宋史本傳

袁韶字彥淳。慶元府人。淳熙十三年進士。嘉泰中爲吳江丞。蘇師旦恃韓侂胄威福。撓役法。提舉常平黃榮檄韶覈田。以定役。師旦密諭意。言吳江多姻黨。倘相容。當薦爲京朝官。韶不聽。是歲更定戶籍。承徭賦皆師旦黨。師旦諷言者將論去韶。榮亟以是事白於朝。且薦之。未幾師旦改韶知桐廬縣。桐

廬多宗室。持縣事。無有善去者。韶始至。絕私謁。莫敢撓。錢塘岸歲爲潮。齧率取石。相廬。韶言。廟子山有石。不必旁取。鄰郡遂得免。嘉定四年。召爲太常寺主簿。父老。旗鼓蔽江。以餞。至於富陽。泣謝曰。吾曹不復輸石矣。後爲右司郎官。接伴金使。使者索歲幣。語慢甚。韶曰。昔兩國誓約。止令輸燕。不聞在汴。使者語塞。十三年。爲臨安府尹。幾十年。理訟精簡。道不拾遺。里巷爭呼爲佛子。平反冤獄甚多。紹定元年。拜叅知政事。胡夢昱論濟王事。當遠竄。韶獨以夢昱無罪。不肯署文書。李全叛揚州。告急。飛檄載道。都城有爭逃避者。乃拜韶浙西制置使。仍治臨安。鎮遏之。丞相史彌遠懲韓侂冑用兵事。不欲聲討。韶與范楷言於彌遠曰。揚失守。則京口不可保。淮桴如卞。整崔福皆可用。適福至。韶夜與同見彌遠。言福實可用。彌遠

從之。遂討全韶。以言事罷端平。初奉祠。卒年七十有七。贈少傅。後以郊恩累贈太師。越國公韶之父爲郡小吏。給事通判廳。勤謹無失。歲滿當代不聽去。後通判至。復留用之。因致豐饒。夫妻俱近五十。無子。其妻資遣之。往臨安置。妾既得。察察之。有憂色。且以蔴束髮。外以綵飾之。問之。泣曰。妾故趙知府女也。家四川。父歿。家貧。故鬻妾。以爲歸葬計耳。即送還之。其母泣曰。計女聘財猶未足以給歸費。且用破矣。將何以酬汝。徐曰。賤吏不敢辱娘子。聘財盡以相奉。且聞其家尚不給。盡以囊中資與之。遂獨歸。妻迎問之曰。妾安在。告以其故。且曰。吾思之。無子命也。我與汝周旋久。若有子。汝豈不育。必待他婦人乃育哉。妻亦喜曰。汝設心如此。行當有子矣。明年生韶。太師在袁正獻公弟子之列。其授受議論雖無可考。然今

甬上尚有師弟秘省坊爲正肅及太師作也。蓋自淳熙以後。慶元一路。悉宗陸子之學。名公卿良士。莫非楊袁舒沈四君子之弟子。而太師又正獻公族子也。其淵源尤爲親切者矣。太師曾孫桷字伯長。仕元爲學士。以文名一代。自號清容居士。有集行於世。蓋亦能繩祖武者也。

楊叔謹恪

楊恪字叔謹。文元公簡之長子也。宋史未有傳。官階所至未詳。惟錢融堂時所爲文元公行狀。稱恪任承務郎沿海制置司。准備差遣。克承家學。勉進未艾。云按叔謹與袁正肅公甫。真文忠公德秀等。比德相友。進學甚優。文元公之教爲之不墜。少時嘗請文元公書訓語。公書舊作授之。云吾鄉日有數語曰。吾兩目散日月之光。四體動天地之和。步步欲風生雲。

起句句若龍吟鳳鳴。其間周旋中規。折旋中矩。珠璣咳唾。蘭
清芬。此豈人力所能爲哉。天機妙用。道體變通。我猶不得而
自知。人又安得而詰我。其啟發之者如此。文元公生平不作
草書。惡其不莊敬。叔謹亦專學楷書。一日過庭。請書訓語。文
元公即書法爲訓。以授之。云。世謂王逸少書爲天下第一。吾
謂逸少書俗字爾。異日嘗以白象山先生先生驚曰。何故。予
起對曰。鄉間有一富戶。爲桃枝細器。寸盈二十。篋緣以小黑
漆。誠極精巧。里人或識之。曰。是某家器物也。故士大夫耻效
之。今逸少之書。何以異此。孔門安得如許暇逸。用力於字畫
也。先生笑而無語。予又曰。逸少如傾國之色。麗則麗矣。而少
莊敬中正之容。君子所不道。故吾字畫。惟方正。古朴和平。近
於隸。蓋今之楷。即隸之訛。隸者篆之變。篆極善。隸庶幾楷。猶

庶幾至於草去古遠矣。孔門之所惡。今世通行之書。不用篆隸。故予爲楷而似隸。庶幾乎三代莊敬中正之遺風。不遂泯絕也。歐陽正矣。和矣。而不古。病在於不方。而媚。虞柳病與歐同。而又弱。顏方正。敬莊古質善矣。所少者和爾。蔡與歐虞柳同。凡是去取。非吾一人之獨見。乃萬古默同之心。其自晉以來。學王之徒。其中心之隱。當亦默同。此默同之心。即道心。顧知之者鮮。女既知之矣。其敬之戒之。毋荒墜。時慶元二年。中冬之十三日。後叔謹通籍得差遣。將之官。文元公書訓語送之。曰。堯舜禹皆聖人。猶相告以執中。又曰。惟精惟一。又曰。安女止。而況於後學乎。女既於道有覺。又嗜欲淡薄。不以死生爲畏。甚不易得。臯陶猶曰。兢兢業業。女切宜克艱。以守中庸。此守非思慮言語可及。可惜。可惜。敬之敬之。兢兢業業。不兢兢業。即

禍福榮辱之樞機云蓋叔謹造詣高而文元公期望之遠如此

趙冢宰彥械

宋儒學案傳略

趙彥械字元道餘姚人累官吏部尚書兼給事中。以文華殿直學士知平江府卒。彥械嘗辨象山先生非禪。又題已易曰聖人之易不離先生之書。不離斯人篤好而刊之心。不離刊者之手。不離觀者之目。不離誦者之口。不離聽者之耳。又不離不刊不觀不誦不聽者之耳目手口。斯旨也。元道實有覺於事親從兄喜怒哀樂兢兢業業日用之間云。

紹定三年夏四月彥械任江東提刑重修象山精舍自爲記云道在篤行不在空言道在反求不在外驚彥械壯歲從慈

湖遊慈湖實師象山陸先生嘗聞或謂陸先生云胡不註六經先生云六經當註我何註六經又觀先生與學子帖有反思自得反而求之之訓有朴實一途之說人見其直易或疑以禪學是未之思也誠意正心以至治國平天下原於致知二字禪矣乎象山蓋學者講肄之地先生沒山空屋傾將遂湮沒載新以存先生之故蹟使人因先生之故蹟思先生之學思先生之教孜孜日思乃至不勉不思從容中道是謂大成若夫山林之峻秀景物之幽深棟宇之多寡廢興之源流非學者志不暇盡記之耳

葉秘書夢得

葉夢得信州貴溪人學於傅琴山先生登理宗嘉泰二年壬戌科傳行簡榜進士官階所至未詳惟象山先生年譜稱其

以淳熙十年庚戌任撫州守。更創三陸先生祠堂。距成進士時四十八年。則其年亦已老矣。包文肅公爲記。謂今郡守國之秘書葉公。則嘗爲秘書丞監者。故以秘書稱之也。先是復齋象山二先生祠。與槐堂異處。淳祐十年。夢得爲撫州守。乃命王宰。以七月六日。鼎創新祠於槐堂之前。翼以四齋。環以門廡。自是規制悉出於郡。夢得自爲之記。其略云。山川炳靈。儒英並出。美適鍾於一門。教可垂於百世。若金谿三陸先生之祠於學宮者。其風化之所係歟。三先生學問宏深。智識超卓。以斯道而任諸身。以先知而覺乎世。其生也。海宇仰而宗之。其沒也。都邑尸而祝之。朝廷又從而褒之。非偶然也。夢得在撫。多惠政。嘗修千金陂。教授趙與軫記云。嘗讀杜君卿通典。建昭中。邵信臣爲南陽太守。於縣南造鉗廬陂。累石爲隄。

傍開六石門以節水勢。用廣溉灌。歲歲增至三萬頃。人得其利。後杜詩爲太守復修其業。時歌之曰。前有邵父。後有杜母。循吏之流風善政。民到於今稱之。惟撫爲郡。以二水合流。號曰臨汝。攷之圖志。臨川水在縣西南五十里。源出定山。以今地勢觀之。合宜。黃崇仁諸水由郡而西。趨豫章。赴彭蠡。此臨水也。汝水源出南城爲盱。自盱入石門爲汝。由郡東文昌堰。遶北城至西津。與臨水合。郡城之山發跡軍峰。重崗複嶂。巍峩岌業。北行二百里。至此爲二水所束止焉。回環繚繞如玉帶。圍腰金石臺。屹峙於外。故里識有臺分堰合之語。川融山結。鍾竒孕秀。人物瑰瑋。生聚繁庶。江右之巨鎮也。汝之上流距城七八里。舊有支港。決而他出。又越二十餘里。方合於正流。相爲消長。若支盛則正壅。塞常可涉。越旬日不雨則絕流。

地脈枯燥。風氣渙散。自唐已有千金陂。遏支而行正。然陂常潰決。紹興間。郡有富民王其姓者。極力築隄以捍。歲久復毀。嘉熙間。太守計院趙公師郡。嘗屬寓公符簿。遂者經營上流。順地勢之直。別鑿小渠。引水以至擬峴臺下。事未及竟。傍無障閼。復成絕潢。後之來者。顧瞻永歎。欲作而復輟者屢矣。今郡守秘書葉公夢得蒞事之。明年燕凝作嘯。迺酌輿言。欲回其瀾。鳩工飭材。浚廣舊渠。築陂絕江。以灌其內。陂三百丈。渠廣二十丈。財用之幣餘而不侵。經費工取之傭雇而不科。夫丁一竹一木。厚酬其直。民樂爲市。咄嗟而辦。源浚流長。舳舻相接。氣聚風宜。漸復舊觀。是役也。肇於淳祐辛亥十月二十日。訖於十一月二十八日。見者咸喟其成之易也。三衢徐三錫實董其事。頗有心計之助焉。或有倡爲浮議者曰。盱城歲

餽連檣巨艦順流而來渠恐難受殊不知網發必俟春夏積雨巨漲然後鼓而下此邦亦然若只常流雖無此陂亦固水行舟也此一不足慮或者又曰溪潰而東多歷年所率爲筒車以資灌溉陂而絕之人失此利殊不知束薪囊沙豈能涸流今西港述陂新陂綿亘倍此而下流自若此二不足慮又曰鰲茗之舟必夾私販若經岸下必慮有檢柅多爲謗議殊不知前此郡務亦布津欄其越稅者未嘗無禁豈以陂而苛征此三不足慮又曰東門長橋民不病若水復古道或至衝啣殊不知橋數十眼受水甚寬前此固聞屋裂於風矣未聞址圯於水也此四不足慮所可慮者閱歲滋久竹折木腐葺之勞費莫繼耳以今計之錢僅一千緡米僅二百石若歲加葺多則十之三四少則十之一二然以一郡之力爲之那輟

亦直易事。特在後之賢侯。加之意爾。固俾前邵後杜之歌。專美於南陽也。郡侯俾與輶識顛刻諸堅珉。故不敢以膚淺辭。姑勉述其槩。併得以剖或者之疑云。淳祐十一年季冬望日。修職郎撫州州學教授浚儀趙與輶記。

鄒知丞近仁

鄒近仁字魯卿。饒州德興人。學於慈湖。仕未達遽歿。慈湖爲墓銘云。某爲樂平。首得鄒夢。遇某字之曰元祥。元祥自有覺。某從而滌其滓。元祥之叔祖居德興名近仁。字魯卿。又來訪道。某與語從容。翼日又與語良久。忽覺厥後數欸語。益信其果覺。嘉定二年春。至行都。又從容累日。歸未幾而疾作。仲夏癸卯。忽盥手振衣而坐。召子曾曰。吾心甚明。無事可言。汝輩修身學道。則爲孝矣。言訖而瞑。元祥以訃來。予哭於寢門之

內曾不憚修途至通名予意魯卿之子已而問之果然予哭
曾哭而拜予答拜唁問既久留終日知曾因元祥而又覺曾
請銘其父墓在龍田山之阿魯卿祖諱聖從嘉州文學父諱
孟登進士科初尉建德後隆興錄參魯卿質直不事文飾以
孝聞惡衣菲食窮居而樂和而敬或干以非義則介焉弗受
告以有過則歛衽謝服所嘗爲雖強禦弗畏以特恩爲靜江
法曹再調龍陽丞娶董氏長子嶧次曾銘曰孔子沒月至日
至者久歿誰其嗣之孟入聖域濂溪明道似之象山陸子則
有之魯卿嗣之

按林氏江西通志作名魯卿字季友號歸軒所著有歸軒
集

宋修叔林

宋林字修叔。浙江金華人。師事陸伯微。見慈湖所爲宋母墓銘云。宋母者。嚴陵王氏。祕丞庭堅之曾孫。吾友宋修叔之母。節行一世罕儷。四方士友尊而稱之。曰宋母。某事象山陸先生。於今幾四十年矣。近四五年始識修叔。修叔澹然脩潔。承事陸先生冢子伯微。亦言其澹然脩潔。修叔遽丁其母憂。既葬。持其所自記母王氏之行實。再拜。又再拜而請銘於某某。觀其四歲喪母。哀事繼母杜宜人。以孝聞。宜人愛同己出。及禮如成人。歸金華。柳守宋子華之子沆字叔子。三十而寡。長子姓纔十有二次。林卽修叔。生五歲而有一月。而朋始生。姓年十有五六。較藝郡庠。數居前列。比王氏誨之曰。女父無恙。時講道於家。未嘗強以語人。而就問者衆。每使學者熟問論語學而時習一章。所學果何學。所習果何習。是弗之思。詎可

效舉子習小技角勝負止於科第而已耶一日具冠帔請於舅乞擇大儒俾就學時呂太史祖謙名動一時遣之從遊大見稱許後姓登紹熙龍飛進士科以及祿養姓字茂叔不幸早死呂子約哭之爲慟云修叔官階無可考後居江西隆興開禧三年冬母疾終明年嘉定改元冬十有二月葬隆興之新建縣桃花鄉白鷺嶺云

孫進士誼

孫誼字子方浙江慈谿人楊文元公之壻也學於公旣成進士而歿文元公以文奠之曰舅某茲致祖奠於故孫甥子方吾甥始以夢中而覺夢中已拱達旦猶拱自是心明達於日用舅剗餘礙喜甥之覺妻甥以長女每每講切謂甥用力於仁庶幾乎仁何壽之促雖有懷中玉力未續續妻與子遽

而哭舅拘官聞訃望哭既歸哭柩日月遄速今且莫甥老不可慟哭哀哉哀哉哀哉

傅正夫佺

傅佺字正夫江西南城人傳通守夢泉之族子也學於楊文元公爲高第弟子嘗輯公議論經籍及訓誨弟子之言爲慈湖訓語今與曾汲古所錄誨語並見慈湖家記中多篤論如云論語乃有子之徒所記首篇首記有子之言又不止於一二章有子尚爲曾子所不可而況其徒乎其所記亦有難盡信者子以四教文行忠信此記者之辭耳孔子曰行有餘力則以學文而記者冠文於首見識又不逮有子矣文元之卒正夫不遠千里以行述訪真西山於粵山之麓請爲墓誌西山題行述後以未能浚悉先生之道不敢爲誌而請爲墓表

又言行述者正夫所纂蓋有得於先生之道者也。正夫藏文元公所書孔壁孝經爲公平生得意之筆。西山亦爲之題跋云。

黃壁林應龍

李子愿恭伯柏  純父劉林應之附見

黃應龍南城縣人。師事傅琴山先生。學行甚高。著述亦富。登淳祐元年辛丑科徐儼孫榜進士第。歷仕官階未詳。學者稱爲壁林先生。明天啟間。禮部主事梁維樞兼管內閣典籍。因編輯內閣書目。中有黃壁林先生文集十四卷。注謂宋嘉熙間黃應龍著。黃爲傅琴山弟子云。

壁林嘗爲陸子年譜跋。謂文安陸夫子沒。門人高弟日遠。而年譜猶缺。友人李子愿恭伯始哀彙。歷年相與討繹。稍備。然未敢定。浮湘至衡。得劉君應之。嘗從傅魯潭學者。柏純父游。

聞象山語。恨莫得詳見。是欣然悅。亟請傳於來世。愚謂時多尚談說。而文安教人。務在樸實。自求故希。專門者。或且隨聲是非。盍徐待其定應之對曰。人心大同。若此。及覩是編。可百世俟聖人而不惑。遂題其論。反復叅訂。質諸先覺遺老。以成其美志。豪傑之士。聞而興者。殆將有考於斯文。應之名。其先代陽朔人。今居南嶽。趣尚古雅。併識其後。寶祐四年丙辰孟冬朔。後學南城黃應龍拜手敬跋。

葉貢士祐之

宋儒學案本傳

葉祐之。字元吉。吳縣人。弱冠鄉貢。有志於學。凡先儒所是者。依而行。所訶者。必戒。如是者十有七年。終未相應。得慈湖子絕四碑讀之。知此心明白廣大。異乎先儒繳繞回曲之說。自

是讀書行已不敢起意。寐中聞更鼓聲而覺。全身流汗失聲。歎曰。此非鼓聲也。如還故鄉。終夜不寐。夙興見天地萬象萬變。明暗虛實。皆此一聲。皆本體光明變化。而目前常若有一物。慈湖至吳。元吉樞衣求教。一聞慈湖言。其物泯然不見。慈湖之詩曰。元吉三更非鼓聲。慈湖一夜聽鵝鳴。是同是異。難聲說。何慮何思。自混成。爐炭幾番來煖熱。天牕一點吐圓明。起來又覩無窮景。水鑑澄光萬里清。

元吉父母俱賢。慈湖誌其妣張氏墓云。張氏諱景昭。故將作監丞允恭之女。孝敬明悟。嘗親書史事親。有孝友之稱。歸司農寺簿諱大顯。字仲謨。有異質。嘗親薛士龍鄭景望。官居守正。民悅。湖海羣冠。仲謨每有韜畧。用事者雖不徇其策。而與論謂善。孺人以夫家司計者。儻廣費。孺人長慮。亟出玩服。

治田太湖上。厥後祖業果告罄。而孺人所治之田。遂爲祭祀
伏臘之需。二女擇配甚嚴。或以爲太過。曰不然。是家故嘗有
了齋。陳公爲壻。不可使俗子壞其素風。士之有學願靖者。令
諸子與之遊。而遠其張皇虛矯者。雖或以科第進。每以爲戒。
故元吉曰。祐之由是不敢苟專試業。閉門不妄交。某至吳。元
吉來訪。報禮甚恭。元吉弱冠與貢。孺人不以爲喜。聞聲而大
警悟。孺人雖喜而未至於甚。及元吉見某後。歸道某言。且謂
若不見先生。止於半途。於是喜甚。某訪元吉。孺人已疾病。命
二女聽於屏間。盡記某之言。以告。孺人舉手曰。幸甚。吾兒得
此於先生也。吾死無憾矣。垂絕。神氣清明。無一語之差云。

曾定遠燭

宋儒學案本傳

曾熠字定遠廬陵人得慈湖已易閒居解二書刊之謂西銘之意認天地爲一家而已易一書悟天地爲一已其流行發見精粗畢備厥功益大然定遠之意欲學者於良知良能苗裔之發見體察而用力慈湖以爲才言體察是未信此心之卽道也定遠復問曰平常正直之心雖人所固有然汨沒斷喪燻燻利欲之塗須體察於膠擾之中而後能不失今懼其起意也不敢體察坐聽是心之所發則天理與人欲並行何以洞識乎慈湖答曰定遠猶未覺未信也易曰百姓日用而不知日用豈無膠擾膠擾乃變化即天地之風雨晦冥也君子見善則遷有過則改改邪足矣故孔子曰改而止改而不止是謂正其心反成起意耳定遠乃喟然曰今而後知此心虛明萬理萬化盡在其中君子所以用力於仁學而不厭者

必有事焉。初非臆意料想之謂也。

曾定遠初刻慈湖已易時。趙家宰元道方以承事知吉水縣。承事因題定遠所刻已易云。先生挈古聖所指詔學者。遂成此書。知有此書者衆。好者鮮。彥懌事先生舊矣。負丞吉水邑士。曾定遠篤信好學。久藏此書。一日携示彥懌曰。先生推明心量之大。使人讀之。萬善備具。思與朋友共。將刊諸版。俾彥懌書於後。噫。定遠其有得於先生之言乎。餘見彥懌本傳。定遠自記已易云。先生已易。宰樂平時。嘗加改訂。燭得其本。因謁知丞趙公。是正之。鋟木以貽同志。或者猶謂先生復有所改。近趙公爲轉致諸先生之前。而先生不復加損。則此爲定本矣。夫六經論語之書。言天下之義備矣。迨孟氏興而復出。性善養氣之說。自孟氏沒。更秦歷漢。以至於今。前聖之意。

隱然而未發者。乃有橫渠之西銘。雖然。西銘之意。認天地爲一家而已。易一書。悟天地爲一已。其流行發見。精華畢備。厥功益大。學者誠能沉潛而反復之。於其一理。渾然之中。知其萬理。森然莫不具在。反諸吾身。覺其機之動。而體驗推放之。雖馴造聖賢之域。可也。嘉定戊辰十月甲子。廬陵曾熠謹書。

趙彖宰元道又題孔子閒居解云。曾定遠既刊先生已易。又刊所解孔子閒居。閒居真聖人之言。伊洛諸賢未嘗及之道之不明也。我知之矣。不肖者不及。賢者又過之。中庸庸常也。弃日用平常而起乎意說。吾不知之矣。嘉定元年十月六日。彥懌敬書。

定遠自題所刻孔子閒居解云。熠頃侍教於知丞趙公。嘗言楊先生昔著孔子閒居解。熠請之而未獲。近乃寄示。誠足以

必有事焉。初非臆意料想之謂也。

曾定遠初刻慈湖已易時。趙家宰元道方以承事知吉水縣。承事因題定遠所刻已易云。先生挈古聖所指詔學者。遂成此書。知有此書者衆。好者鮮。彥懌事先生舊矣。負丞吉水邑士。曾定遠篤信好學。久藏此書。一日携示彥懌曰。先生推明心量之大。使人讀之。萬善備具。思與朋友共。將刊諸版。俾彥懌書於後。噫。定遠其有得於先生之言乎。餘見彥懌本傳。定遠自記已易云。先生已易。宰樂平時。嘗加改訂。熠得其本。因謁知丞趙公。是正之。鋟木以貽同志。或者猶謂先生復有所改。近趙公爲轉致諸先生之前。而先生不復加損。則此爲定本矣。夫六經論語之書。言天下之義備矣。迨孟氏興而復出。性善養氣之說。自孟氏沒。更秦歷漢。以至於今。前聖之意。

隱然而未發者。乃有橫渠之西銘。雖然。西銘之意。認天地爲一家而已。易一書。悟天地爲一已。其流行發見。精華畢備。厥功益大。學者誠能沉潛而反復之。於其一理渾然之中。知其萬理森然。莫不具在。反諸吾身。覺其機之動。而體驗推放之。雖馴造聖賢之域。可也。嘉定戊辰十月甲子。廬陵曾熠謹書。

趙彖宰元道又題孔子閒居解云。曾定遠旣刊先生已易又刊所解孔子閒居。閒居真聖人之言。伊洛諸賢未嘗及之道之不明也。我知之矣。不肖者不及。賢者又過之。中庸庸常也。弃日用平常而起乎意說。吾不知之矣。嘉定元年十月六日。彥懌敬書。

定遠自題所刻孔子閒居解云。熠頃侍教於知丞趙公。嘗言楊先生昔著孔子閒居解。熠請之而未獲。近乃寄示。誠足以

開後學。因鉅木以傳之。夫孔子之言。見於六經。論孟者。人所尊信。惟雜出傳記者。雖戴聖所傳。人猶未之盡信。惟大學中庸。先儒所推尊。故學者講誦。至若孔子閒居。昔賢未嘗留意。今先生首發明而誨解之。得非謂五至三無。皆人良知良能。苗裔發見於心端。誠可體察而用力者歟。彼坐談高遠而不隱諸內心者。可以自省矣。嘉靖戊辰十一月甲子。廬陵曾熠謹書。

張渭叔渭弟清叔汾

張渭字渭叔。初事呂寺丞祖儉。後與弟汾並師事慈湖渭。早卒。慈湖銘其墓云。越之新昌張渭。字渭叔。某之爲國子博士。以言事罷歸也。韓侂冑方用事。時論誣善類曰。僞學。舉子文字。由是大變。不敢爲理義之言。如某見謂僞學之尤者。而渭

叔不遠數百里與其兄弟皆至願握衣焉從容數月未嘗一語及舉子事業某於是信其人與之語無他說大旨惟本孔子之言曰心之精神是謂聖孟子曰仁人心也人心卽道故舜曰道心日用平常之心卽道故聖人曰中庸庸常也於平常而起意始差始放逸渭叔領會無疑今其季汾清叔曰渭叔蓋頓有覺焉後移書曩所師寺丞呂先生先生甚喜善其有覺賀先君有子先生諱祖儉渭叔弱冠有俊譽富戶欲妻之渭叔笑不顧以爲論財夷虜之道後知玉牒趙共甫賢遂聘其兄之子雖甚窶安焉親故洪雨若之親喪未舉告渭叔命其室人傾囊周之衆人咸以爲難篤於好善勇於改過朋友之所共敬得年僅三十七而不祿實嘉定元年二月望日哀哉越三月而趙氏產男名堅老將以庚午五月戊戌葬於

其鄉之董塿渭叔之父諱汝弼某已嘗銘其墓今又銘渭叔墓銘曰人心虛明變化云爲不可度思渭叔覺斯

孫明仲

宋儒學案本傳

孫明仲富春人慈湖爲富陽簿明仲從學聞執事敬一言日夜從事至右手運用左手猶拱其專如此如此者閱兩旬忽大喜喜止又驟悲悲止而泰然和平矣自是發言頓異曩時召爲里正公移方急而曰出入阡陌奔走應辦憂勞辛苦則甚矣而心實未嘗微動也紹熙三年卒

王子庸

宋儒學案本傳

王子庸錢塘人慈湖爲浙西撫屬子庸問學自謂有疑慈湖

告以不假更求本無可疑。子庸曰：非不知之而疑自若也。積十八九年，淑景揚輝，耀然如脫。從此不復疑矣。再見請益，慈湖曰：習氣之未易消釋也如此。猶有未盡者，意也。先聖之所止絕也。止絕此意者，又意也。又先聖之所止絕也，卽意卽疑。何思何慮，縱心盡意，匪動匪止。孝於親，友於兄弟，信於友，恂恂於鄉里。自先聖曰：吾無知也，而某亦安得所知以告子庸也。

黃氏宗羲曰：慈湖所傳皆以明悟爲主。故其言曰：此一二十以來覺者踰百人矣。古未之見。吾道其亨乎。然考之自錢融堂、陳和仲以外，未必皆爲豪傑之士也。而況於聖賢乎。夫所謂覺者，識得本體之謂也。象山以是爲始功，而慈湖以是爲究竟。此慈湖之失其傳也。四明志云：舒氏門人有李元白者。

字三江慶元奉化人。仕爲國子博士。初從蔡文懿。又傳廣平詩學。歸教其子。以稱以制。以益從子伯誨。伯森皆舉世科。門人黃應春。杜夢觀。安劉王良。其傑然者。廣平在新安與慈湖書言學中諸生。自得羅子有。鄧夢真。汪行簡。戴泳。皆起發可進。今皆不可考矣。又袁絜齋。門人有朱元龍者。先事呂東萊。後事絜齋。又有胡謙。字牧之。弟誼。字正之。奉化人。並師事絜齋。兄弟文學。皆爲鄉黨表式。謙別號東齋。著易說易林。誼別號觀省。佚翁。著觀省雜書三十卷。尚書釋疑十卷。沈氏門人有竺大年。字耕道。亦奉化人。性行嚴重。長於說禮。家法整肅。鄉人皆化之。爲端憲公高第弟子。所著有禮記訂義等書。楊琪銘其墓。按竺氏先世服田。大年之父竺頤始遣其子從師。他日喜而語舒廣平曰。諸子自得師。粗厲之習。變而爲儒雅。

暴慢之氣轉而爲溫厚。非曩日比矣。蓋順之意亦淺鮮矣。而豈知追原學脉者。乃及大年哉。然則人亦何必羨夫貴仕也。又有呂人龍者。淳安人。受學於錢時。爲世所稱。有洪楊祖者。淳安人。袁甫之門人也。舒津。字通叟者。奉化人。文靖公從孫。讀書績學。期至古人。登景定三年進士第。遷太學博士。知平江蒞事。勤敏雅志。澹如。嘗博采傳記。著續蒙求。尚書解。春秋集註。十七史綱目。從弟澣。字平叟。清苦獨立。景定元年入太學。講明正學。雖寒暑弗懈。著易釋二十卷。繫辭釋三卷。讀史隨筆五卷。心書六卷。一門經學。人謂得文靖公之傳。又有李洧。孫字甫山者。寧海人。師事舒津。登宋甲戌進士第。受迪功郎。黃州司戶叅軍。未上而宋亡。大德六年。爲杭州儒學教授。以黃巖州判致仕。人稱爲霽峯先生。當時楊袁舒沈之學。東

浙學者家傳而戶誦也。今姑錄其可考者附門人之後焉。
又有史守之者。字子仁。史氏家傳云。丞相浩之孫。以祖蔭官
朝奉大夫。主管紹興府千秋鴻禧觀。賜緋。退居月湖之松島。
時彌遠方貴盛。而守之心非其叔父所爲。著昇聞錄以寓規
諫。彌遠每有所爲。必曰。十二郎莫知否。寧宗御書碧沚二字
賜之。又清河書畫舫云。守之築別墅于甬東。名鴻禧府。延慈
湖絜齋講學。其中嘉定間起倖嘉禾不就。所著有世學二十
四卷。潛虛解。心易子。尋卿。字景伯。尚郡主。知嵯縣。有仁聲。又
有孫枝。字吉甫者。鄞人。成化寧波府志云。枝父允受業于沈
端憲公之父。越州簽書判官銖。故枝少郎從端憲遊。嘗問學
于朱子。著尚書解十三篇。袁正憲公見而嘆曰。初謂子善爲
文。不意造理乃爾。嘉定間與長子起予同登袁甫榜進士。枝

卓邁有智略。自秦隴荆襄達于淮海。凡邊事軍謀無不練達。淮帥延至幕下。枝以祿不逮親。辭不就。起予累官太常少卿。有清廉聲。次子願質。紹定五年進士。累官工部侍郎。又有黃應春。字元英。號西軒者。奉化人。成化寧波府志云。應春受業于李元白。嘉熙二年進士。遊臨安。四方之士翕然宗之。內翰應係。左史黃自然。以其所著詩說繳進。送監看詳。除國子錄。累官朝散郎。知處州廣平門人。以應春爲最。云又有王文貫。字貫道者。鄞人。寧波府志云。文貫中寶慶二年進士。嘗從舒文靖公遊。得其詩學之傳。時甬東以詩著者。余太學端臣以慶源輔氏爲宗。文貫亦受業焉。教授真州。除宗學諭。弟宗道。嘉定元年進士。于詩亦有論著。

朱擇善薛王成

朱擇善名未詳。湖州烏程人。丞相勝非之孫也。師袁正獻公。擇善嘗往訪真文忠公。德秀於閩。德秀送以序云。自余歸西山之草廬。掩關謝客。足不越中賓門之域者。將期年於茲矣。居一日。烏程朱君來謁。以書先焉。余視之。辭義卓然。意氣甚偉。亟延入與語。問其族出與素所師友。則丞相忠靖公之孫。且嘗遊於絜齋袁先生之門者也。酒數行。作而言曰。僕之始學也。聞誠意正心之說。以爲直易易耳。今從事於此。固已有年。而一臨利害之境。則自私之念。崢嶸乎其中。有不可遏者。夫然後知其爲匪易也。君將何以教我。使免於是邪。予曰。昔人不云乎。君以爲難。則易將至矣。惟吾子前日之易也。是以一念之忽。而去道遠焉。今而難之。是子進德之機也。雖然。予嘗聞之君子。蓋學問之道有三。曰省察也。克治也。存養也。是

三者不容有一闕也。夫學之治心者。猶其治疾然。省察焉者。視脉而知疾也。克治焉者。用藥以去病也。而存養者。則又調虞愛護以杜未形之疾者也。今吾子於私意之萌。能察而知之。其亦可謂善學者矣。然知私意之爲害。而未能勇以去之。是知疾之所由生。而憚於藥之治者也。昔者顏子問仁於夫子。夫子以克己告之。克云者。戰勝攻取之謂。而非悠悠玩愒之可言也。吾子誠欲絕其私意之萌。盍亦感勵奮發。如去蝨賊。如殄寇讐。毋徒恃其知而已也。書曰。若藥弗瞑眩。厥疾弗瘳。夫瞑眩所以愈疾。疾愈矣。然後和平之劑施焉。此存養之功。所以必繼於克治之後也。然則亦有其要乎。曰。敬爲要。敬何所自始。曰。自戒懼謹獨始。子歸取聖賢之書。而熟復之。當有以知子言之非謬也。然余之於學。亦所謂知之而弗能允。

蹈者也。斯言也。豈獨以勵吾子。蓋因以自勵云。又有薛王成者。名未詳。永嘉人也。嘗學於楊文元公。著述甚富。子璩。字叔容。能繼其學。著述亦富。淳熙間。臺省交薦。賜出身史館。劉克莊謝子強上其所著書。入元不仕。林霽山景熙作二薛先生文集序云。永嘉自許少伊右丞。周恭叔太博。劉元丞給事。受業程門。爲最先一輩。而義理之學。始於此矣。生而晚者。雖不及成德達材之列。而亦竊聞私淑之教。見知聞知。成功一也。薛氏世學。蓋三百年。最後王成公。學於慈湖楊敬仲。刊華據實。循程門緒餘。僞學禁興。隻手衛道。著伊洛源流。各爲譜傳。書成而化。更生人之類。不爲鬼蜮禽獸。吾道力也。又以弓冶授其子叔容。公志弘力毅。負荷千年。念聖遠言湮。爲孔子集語二十卷。念國內外治疎。爲采薇天保末議二卷。念伊傅周

名之業不復見。隨世蹇淺。不能登其主於三代爲宅揆成鑑。二十二卷薦紳劍進。上經一覽藏之秘府。以詔厥來。會兵興。君亮區區收拾於烟埃零落之餘。兩世遺文。其僅存者泰山毫芒而已。水心嘗曰。爲學而不接統緒。雖博無益也。爲文而不關世教。雖工無益也。二先生之學之文。豈徒博而工哉。統緒之的。教化之要。於此乎在。君亮早自矜飭。懼不克紹以貽斯文。羞况當升降絕續之會。世方仇學而欲壽其世。學者力益難。心益苦。君亮勉之立言垂世。仁也。繼志述事。孝也。仁且孝。聚於薛氏祖子孫三世。嘻。公亦重可敬夫。

曹叔達夙

曹夙字叔達。餘干人。慈湖令樂平時。叔達往謁。見於縣庠。聞其提唱。晝夜思之。至忘寢食。凡十有四五日。而忽覺。與樂平

舒益裕甫齊名慈湖。歿之未仕而沒。慈湖以文奠之曰。哀哉痛哉。叔達叔達。哀哉哀哉。叔達篤志於道。晝忘食。夜忘寢。踰浹旬而忽覺。二千年來覺者甚無幾。比覺者雖滋衆。而每思念吾黨之士。叔達未嘗不在懷想中。比裕甫遠來。卽訪動靜。裕甫莫之知。適通史使君書。崇儒重道。某備言裕甫叔達之洞達。使君報緘曰。叔達物故矣。哀哉痛哉。哀哉痛哉。老不能慟望。哭敬遣斯奠。哀哉哀哉。

鄒貢士夢遇

鄒夢遇。樂平人。以詞賦舉鄉貢進士。慈湖來爲令。師事之。未得第而卒。慈湖題其墓碣云。饒之樂平鄒夢遇。字元祥。四明楊某之宰樂平也。夢遇與鄉貢自是相與從容。後某以職事至蘭若。夢遇見次言。近覺某叩之。知其覺矣。而猶不無阻。隨

通之自是益澄明。後又得夢遇之叔祖近仁字魯卿與之語。厥明再語而頓覺。未得比邑餘干之曹夙字叔達。叔達留縣庠。晝忘食。夜忘寢。旬有四五日而忽覺。嗚呼盛哉。自孔子歿。學者率陷溺於文詞論議。喪其本靈。而事口說寥寥二千載。其自知自信者有幾。若三子者可謂自知自信。孔子曰。心之精神是謂聖人。皆有是心。百姓日用而不知。三子知之。魯卿之子曾字伯傳。比年亦覺。嗚呼盛矣。元祥事親至孝。篤愛諸弟。嘗語人曰。事親從兄之際。不思不勉。無非實地變化云。爲弛張闔闢。宇宙在吾手。又曰。渾然之中。品節條理。燦然以列。又曰。人皆以兀坐端默爲靜。吾獨以步趨應酬爲靜。人皆以步趨應酬爲動。吾獨以兀坐端默爲動。其舅謂元祥色溫言約。神定氣和。喜愠不形。動容周旋。莊肅閒泰。其處事一於義。

理不可奪。別後進德。厥效乃爾。久欲來見。嘉定四年春。赴禮
闈。罷而疾作。不可來。歸略平。孟夏三日。命二子扶坐。艮齋。自
謂氣雖微。而神則嘉。時齋明喜甚。哦曰。嘉木扶疎兮。鳥鳴關
關。暑風舒徐兮。庭中閒閒。起視天宇兮。浩乎虛澄。還中堂。與
家人茗飲罷。就寢而歿。訃至永嘉。哭於燕堂。遣奠臘月。其子
自得使弟自厚來。某對哭。自厚再拜。葬有日。請誌其墓。銘之
曰。人心至靈。自通自明。元祥無能有所增。唯不動乎意。不昏
其本靈。

樂平自元祥從邑宰楊公遊。其叔祖魯鄉繼之。自是邑之學
者靡然向化。並爲陸子之學。先後覺悟者甚衆。其尤著名見
林氏江西通志者。有舒益。字裕甫。洪簡。字子斐。以蔭補官。知
茶陵縣。曹正。字性之。官永明尉。學有自得。寂靜弗忘。酬應非

擾方溥字成太誠確正直吳埴字仲和馬樸字季文以經學薦授廣昌主簿子燮字敬叔猶子應之字定翁王琦字表文以文薦補學博余元發字永之以詞賦薦王晉老字子康以蔭入仕篤志於道皆楊公弟子云

鍾國錄宏

西江人物志

鍾宏字子虛樂平人從邑宰楊簡游大見器重登嘉定進士主建德簿再任貴溪丞著惠政同門袁甫表諸朝稱其學有淵源實得故閣學楊簡之傳由兩浙漕屬入爲太學錄供職甫一月謁告省親累擢皆不起

桂待制萬榮

寧波府舊志本傳

桂萬榮字夢協。慈谿人。楊文元公弟子。慶元二年進士。授餘干尉。邑多豪右。一裁以剛介。御民以慈。秩滿。民爲乞留。子弟獲其訓迪者。恥爲不善。嘉定戊辰。調建康推官。時相史彌遠欲招致之。萬榮固辭。尋差主管戶部架閣。明年除太學輪對。奏絕虜選將二事。一以義斷。除武學博士。尋除宗學橫經。上方嚮用力求補外。通判平江。時守朱在。政嚴刻。以鹽課拘繫甚衆。萬榮具書告。在不從。於是挾行牀與所拘人同寢。在媿。即委縱遣。陞守南康。御悍軍省浮費。察奸吏。民幸其利。三疏丐祠。進直秘閣。遷尚書郎。特奏二劄。上嘉之。因請老。除寶章閣待制。奉祠崇禧宮。嘗築室東山之麓。號石坡書院。讀書其中。取古人資於折獄者。爲棠陰比事。行於世。從子錫孫紹定五年進士。精於春秋。累官監察御史。兼崇政殿說書。紹其家。

學慈湖書有遺桂夢協一則云夢協謂心之精神是謂聖此
聖人之言何敢不信但學者所造有淺深某謂道無淺深先
聖曰改而止謂改過即止無庸他求精神虛明安有過失意
動過生要道在不動乎意爾

陳文定公宗禮

宋史本傳

陳宗禮字立之少貧力學袁甫爲江東提點刑獄宗禮往問
學焉淳祐四年舉進士調邵武軍判官入爲國子正遷太學
博士國子監丞轉秘書省著作佐郎入對言火不循軌帝以
星變爲憂宗禮曰上天示戒在陛下修德布政以回天意又
曰天下方事於利欲之中士大夫奔競趨利惟至公可以遏
之兼考功郎兼國史實錄院校勘兼景獻府教授升著作郎

遷尚左郎官兼右司。時丁大全擅國柄。以言爲諱。宗禮歎曰。此可一日居乎。陛對言願爲宗社大計。母但爲倉廩府庫之小計。願得天下四海之心。母但得左右便嬖戚畹之心。願寄腹心於忠良。母但寄耳目於卑近。願四通八達以來正人。母但旁蹊曲逕。類引貪濁。拜太常少卿。以直寶謨閣。廣東提點刑獄。進直煥章閣。遷秘書監。以監察御史虞處言追兩官。送永州居住。景定四年。拜侍御史。直龍圖閣。淮西轉運判官。遷刑部尚書。以起居舍人曹孝慶言罷。度宗即位。兼侍講。拜殿中侍御史。疏言恭儉之德。自上躬始。清白之規。自宮禁始。左右之言利者。必斥蹊隧之私獻者。必誅。以詩進講。因奏帝王舉動無微不顯。古人所以貴於慎獨也。權禮部侍郎。兼給事中。進讀孝宗聖訓。因奏安危治亂。常起於一念。慮之間念慮。

少差禍亂。隨見天下之亂。未。有。不。起。於。微。而。成。於。著。又。言。不。以。私。意。害。公。法。通。國。之。福。帝。曰。孝。宗。家。法。惟。賞。善。罰。惡。爲。尤。謹。宗。禮。言。有。功。不。賞。有。罪。不。罰。雖。堯。舜。不。能。治。天。下。信。不。可。不。謹。也。遷。禮。部。侍。郎。尋。權。禮。部。尚。書。乞。奉。祠。帝。曰。豈。朕。不。足。與。有。爲。也。耶。以。華。文。閣。直。學。士。知。隆。興。府。再。辭。依。舊。職。與。待。次。差。遣。逾。年。依。舊。職。廣。東。經。略。安。撫。使。兼。知。廣。州。加。端。明。殿。學。士。簽。書。樞。密。院。事。尋。兼。權。參。知。政。事。疏。奏。國。所。以。立。曰。天。命。人。心。因。其。警。而。加。敬。畏。天。命。未。有。不。可。回。也。因。其。未。墜。而。加。綏。定。人。心。未。嘗。不。可。回。也。卒。官。遺。表。上。贈。開。府。儀。同。三。司。盱。江。郡。侯。謚。文。定。所。著。有。寄。懷。斐。藁。曲。轅。散。木。集。兩。朝。奏。議。經。筵。講。義。經。史。明。辨。經。史。管。見。人。物。論。

按文定公江西建昌之南豐人宋史本傳失載籍貫今補

入文定公入對。每以謹念慮之微。嚴義利之辨爲主。蓋陸子之教。至文定而一光。當時盡用其言。則宋祚猶可少延。而惜乎愠于羣小。進退無恆也。

文樞密及翁

文及翁字未詳。宋史未立傳。惟四明舊志稱爲德祐時累官簽書樞密院事。平生讀書以求心名。其齋篤好慈湖之學。于其片言隻字收拾殆盡。咸淳間制置使劉黻請於朝。即楊文元公宅爲慈湖書院。在慈谿縣東北五十步。屬及翁爲之記。其畧曰。慈湖先生昔在大學肄業。循理齋足不踰閑者累年。一日冠帶揖謝同舍郎曰。某悟道宴坐返觀。忽然見天地萬物萬理澄然一片。向者所見萬象森羅。謂是一理貫通。疑象與理未融一澄然一片。更無象與理之分。不必言象。不必言

理亦不必言萬亦不必言一自是一片此是先生知至之始
事也又觀象山陸文安公發本心之問舉扇訟是非以對忽
省此心之清明忽省此心之無始末忽省此心之無所不通
守永嘉日謁先聖又謂自幼而學長而始覺此心澄然虛明
無體廣大無際日用云爲無非變化此先生知終之終事也
先生忠信篤敬發言必由忠信而有証其註孝經述易解春
秋纂先聖大訓條治務最急者六次急者八遺文訓語皆先
生精神流動先生家于四明之慈湖詠春諸詩有浴沂詠歸
灑然出塵意花香竹影山色水光鶯吟鶴舞皆道妙之形著
今王牒侍讀文昌劉公嘗執筆于太史氏爲先生作傳及開
閩府于四明奏請于朝乞爲先生賞延于世即先生舊宅創
書院于慈湖之濱規模軒豁衿佩鏘鳴相其役者縣宰王君

愉提管陳君允平噫俗流失學士大夫童習白紛謾不知心
爲何物驅血氣而角功名決性命而饗富貴喪精神以失虛
靈者摠摠也藏山之卷九千插架之軸三萬手不停披口不
絕吟亦祇以鈞聲譽梯利祿膏唇吻飾簡牘而已矣出入口
耳之學各是其是反以心學爲非至有疵先生之學爲禪學
者何異衆人皆醉反執獨醒者以爲狂此先生之所以太息
復太息也書院有規廩稍有籍春秋之法常事不書敢書其
大者以驗同志咸淳九年良月吉日記

按文昌劉公制置使劉黻也作書院見宋史黻本傳寧波
府志云書院歲久頽圯嘉靖間其裔孫楊淡修葺之淡于
書院之西數十步又作小樓三楹制甚朴陋扁曰鳩居樓
前爲圃八九畝而獲常數十畝之殖歲有餘饗焉淡蓋自

食其力。無求于人者。故勤而勞。約而不困。儉而能施。樂而有常。其滿林桑菽。有五柳之餘風。故人皆稱爲不詩酒之陶元亮云。

馬莊敏公光祖

宋史本傳

馬光祖字華父。婺州金華人。寶慶二年進士。調新喻主簿。已。有能名。從真德秀學。改知餘干縣。差知高郵軍。遷軍器監主簿。差充督視行府叅議官。奉雲臺祠。差知處州。監登聞鼓院。進太府寺丞。兼莊文府教授。右曹郎官。出知處州。乞降僧道牒。振濟詔從之。加直祕閣。浙東提舉常平。移浙西提點刑獄。時暫兼權浙西提舉常平。起復軍器監。總領淮東軍馬錢糧。兼知鎮江。進直徽猷閣。江西轉運副使。兼知隆興府。以右正

言劉漢弼言罷。後九年。起直徽猷閣。知太平州。提領江西茶鹽所。進直寶文閣。遷太府少卿。仍知太平州。提領江淮茶鹽所。遷司農卿。淮西總領。兼權江東轉運使。拜戶部尚書。兼知臨安府。浙西安撫使。帝諭丞相謝方叔趣入覲。乞嚴下海米禁。歷陳京師艱食。和糴增價海道致寇三害。加寶章閣直學士。沿江制置使。江東安撫使。知建康府。兼行宮留守。兼節制和州。無爲軍。安慶府三郡屯田使。加煥章閣。尋加寶章閣學士。始至官。即以常例公用器皿錢二十萬緡支犒軍民。減租稅。養鰥寡孤疾無告之人。招兵置砦。維錢助諸軍昏嫁。屬縣稅折收絲綿絹帛。倚門除免以數萬計。興學校。禮賢才。辟召僚屬。皆極一時之選。拜端明殿學士。荊湖制置。知江陵府。去而建康之民思之不已。帝聞。命以資政殿學士沿江制置大

使江東安撫使再知建康。士女相慶。光祖益思寬養民力。興廢起壞。知無不爲。蠲除前政逋負錢百餘萬緡。魚利稅課悉罷。減予民。修建明道南軒書院。及上元縣學。撙節費用。建平糴倉貯米十五萬石。又爲庫貯糴本二百餘萬緡。補其折閱。發糴常減於市價。以利小民。修飭武備。防拓要害。邊賴以安。其爲政寬猛適宜。事存大體。公田法行。光祖移書賈似道。言公田法非便。乞不以及江東。必欲行之。罷光祖。乃可進大學士兼淮西總領。召赴行在。遷提領戶部財用。兼知臨安府。浙西安撫使。會歲饑。榮王府積粟不發廩。光祖謁王。辭以故。明日往。亦如之。又明日又往。臥客次。不得已見焉。光祖厲聲曰。天下孰不知大王子爲儲君。大王不於此時收人心乎。王以無粟辭。光祖探懷中文書曰。某莊某倉若干。王無以辭。得粟。

活民甚多。進同知樞密院事。尋差知福州。福建安撫使。以侍御史陳堯道言罷。以前職提舉洞霄宮。再以沿江制置江東安撫使。知建康郡。民爲建祠六所。乞致仕。不許。咸淳三年。拜叅知政事。五年。大知樞密院事。兼知政事。以監察御史曾淵子言罷。給事中盧鉞復繳奏新命。以金紫光祿大夫致仕卒。謚莊敏。光祖之在外。練兵豐財。朝廷以之爲京尹。則剗治。浩穰風績凜然。三至建康。終始一紀。威惠並行。百廢無不修舉。云。

按莊敏從學於袁正肅。得正肅經濟之實學。所至有政聲。是時真文忠與正肅二公繼朱陸二先生之後。並稱理學名臣。故莊敏兼師文忠。至元修宋史。凡兼事朱陸二先生。止稱朱。不稱陸。其再傳弟子亦然。蓋當時以朱註取士。

下人止知有朱並諱言陸而莊敏此傳亦止稱師真文忠也。莊敏號裕齋。其總領淮東兵馬錢糧時刻正肅文集於饒院。見正肅子從所爲文集題跋。今附於後。

正肅公有蒙齋集。子從題其後云。先君子正肅公文集四十卷。門人裕齋馬公刊于淮東饒所矣。片言隻字散落尚多。友朋相與彙集得十六卷爲續集。其奏議駁疏爲前本所未出者。今併刻之。家傳國史附焉。追惟先德。九原不可作。名節在朝廷。政教在郡國。道學在士夫。不肖孤何足以知之。姑識歲月於卷末云。咸淳甲戌十月男朝奉郎知永州軍州兼管內勸農營田事節制軍馬借紫從拜手敬書。

